

NAZ.
le III

II

BIBLIOTECA NAZ.

Vittorio Emanuele III

XXXII

B

68

RAOLI

B
68.



~~Scant 25 Num 48 fol~~

Scantia onum p. libro 23

Sup²

DE COMETA
ANNI CIO. IDC. XVIII.
DISSERTATIONES
THOMÆ FIENI
IN ACADEMIA
LOVANIENSI
MEDICINÆ
Concedit de Capuccin. di. n. r. d. p.
ET
LIBERTI FROMONDI
PHILOSOPHIÆ
PROFESSORVM.

*In quibus tum istius motus, tum aliorum omnium
essentia, effectus, & præsagiendi facultas decla-
rantur.*


Eiusdem THOMÆ FIENI
Epistolica quæstio.

An verum sit, Coelum moueri, & Terra
quiescere.


ANTVERPIÆ
Apud GVLIELMVM à T
sub signo Gryphi. M. DC. XIX.



*B. A. Nova
Capuc. Neap.*



EXCELLENTIS. ET AMPLIS. VIRO
DOMINO
FRANCISCO PAZ
REGIÆ CATHOLICÆ
MAIESTATIS
ET
SERENISSIMORVM
PRINCIPVM BELGARVM
MEDICO L.M.D.C.
LIBERTVS FROMONDVS.

 I Te toto Belgio eruditio-
torem, si arcanorum
Naturæ curiosiorē repe-
rissem, EXCELLENTISSIME
DOMINE, non haberes
hoc è cœlo munus. COMETAM no-
strum dico, quem cōsentiente, imò
præcunte Clar. Viro Thoma Fieno
Academiæ nostræ Archiatro, natu-
ræ cœlestis, & in æthere summo in-
ter sidera Errantia palantem consti-
tuo. Vides non meliorem muneris

EPISTOLA

partem, à me esse, & nihilominus
tamen, Domino non renuente, imò
inuitante interesse gratiæ putavi, et-
iam alieno tibi placere. Si mea e-
nim spernes; tanti Viri, & cuius ali-
bi ingenium mirificè probasti; non
poteris: qui te etiam sine fine erudi-
tionemque tuam extollit ac differt.
Maçti hac virtute Hispani, & non
armis solùm, sed ingenio implete
Terrarum Orbẽ. sic enim est, Mar-
tem vestrum vtrique Orbi terribilẽ
ingenioso Mercurio æquatis, & in
incerto est, cedatne Eruditæ Arma-
ta Pallas. Si enim Theologiam, si Iu-
risprudentiam, si Medicinam, si Phi-
losophiam adspicio, vbique video,
penes vos Principatum. Septẽtrio-
nem corpore, Meridiem ingenio va-
lidũ fama olim, & res habebat: rara
fæli-

DEDICATORIA.

fælicitas, Natura vtrumque in vos addensauit, & dotes, quas alibi spargere solet, hîc cumulauit. Tu à gente tua non abis EXCEL.^{me} DOMINE: imò illa à te videri potest; ita inter doctissimos tu planè Excellentissimus emicas. Eâ re Monarcha Catholicus Medicorum suorum Concilio te miscuit, Serenissimus Belgarum Princeps etiam præfecit: id est, Patriæ fælicitatem vnâ credidit, quæ in illo tota nititur, cuius legis valetudinem. Huc artes, huc vitalia omnia pharmaca (quod facis) congere, vt labentes venas corrigas (vtinam nobis etiam recoquas instar Æsonis!) vnde nos sanguinem trahimus & vitam. Breuia enim, Syrtes, naufragia metuimus amisso hoc Nauarcho. Deus il-

EPISTOLA DEDICATORIA.

lum per Te nobis sospitet, Teque ut
illum possis, EXCEL.^{me} DOMI-
NE: & tot Annalium testibus, imò
Orbis Terrarum præiudicio infami
COMETAE aliquid melioris famæ ad-
spira, & tuæ.

Louanij pridie Calendas

Februar. M. DC. XIX.

LIBERTVS FROMONDVS
CLARISSIMO VIRO
THOMÆ FIENO
IN ACADEMIA
LOVANIENSI ARCHIATRO
S. D.

Peregrinum nuper istud in æthere sidus, an ignem vidisti, CLARISSIME VIR; & magnitudinem, motū, semitam, quæ erepsit in Septemtriones, non dubito, notasti, & cetera, quæ ad eius ingenium. Si bene, Te enim noui, non dormisti ad tam illustre spectaculū. Vetera quippe illa medicina columina, hoc etiam Natura, & Astrorum amore amularis: nec intra humani corporis, aut elementorum ambientium angustias curam contineres, sed longius in cælum mittis. Hoc est, quod Te potissimum è totâ hâc studiorū Vniuersitate delegerim, ad quæ

A 4 scri-

scribere. & pariter inuitabat benignus
ille affectus, quem largiter in me fun-
dis. Doce nos ergo Magne Magister,

Vnde rubescences ferali crine Cometæ.

Quâ materiâ, & ubi flagrent:
quis eos incitet motus, quid lugubre
ferant. Detrahe aut adauge eis infam-
iâ. Gratiâ Galli, Itali, Hispani, &
vicini nostri Germani Astronomia
hodie Principes debebunt: & cōside-
rationibus suis cōponent, si similitudi-
ne fortè, aut diuersitate certam eliciât
parallaxin, altitudinisq; deinde conie-
cturâ, & cælestine Mundo miscere
debeamus, an Elementari. Philosophia
etiam veritatis aliquis hinc radius
affulgebit, & gloria Tibi magnus.
Vale magnû Academia nostra decus,
& ama quæ te reueretur, & à virtute,
& eruditione æternum suspiciet.

Louanij ex Falcone nostro 3. Idus
Ianuarias M. DC. XIX.

THOMAS FIENVS
D. LIBERTO FROMONDO
PHILOSOPHIÆ

*Professori eruditissimo,
S. D.*



Alde vācors , & parum cu-
riosus rerum naturalium sim,
ERVDITISSIME D. PRO-
FESSOR , si eximium illud
mundi miraculū, Cometem,
qui hisce postremis mēsis,
Nouembri scilicet, ac Decembri anni præce-
dentis, & hoc Ianuario anni M. DC. XIX.
præsētis nobis illuxit, & etiamnum adhuc,
etsi admodum tenuiter illucet, non aliquan-
do intueri, admirari, obseruareque statuisse.
Itaque aspexi & consideraui frequenter, &
serē toties, quoties, per auræ serenitatem li-
cuit: plerumque ter vnā nocte, horā sextā ve-
spertinā, duodecimā noctis, & sextā matuti-
nā. Quid autem circa eum animaduertērim,
& quod meū sit de eius motu, essentiā, loco,
ac præsagiendi potestate iudicium; libenter,
vt petis, perscribo. Rogans, vt cum meum vi-
deris, atque examinaueris, tuū quoque cō-
municare

municare non graueris, & quid de meo sentias, declarare. Scribo autem hæc præprope-
rè, leuì rudiq̃ue Mineruâ, ac stylo plane philo-
sophico; tum, quia quæstio Philosophica est,
& Tu Philosophiæ Professor. Tum etiâ, quia
praxis mea, & quotidiana Professio, & studia
medica magis seriâ, me multum operâ hisce
impendere non permittunt minusq̃ue orna-
tui ac phaleris adhibendis.

Quo tempore nobis primùm Cometa iste
illuxerit, non satis constat. Ferunt ruri habi-
tantibus, atque Agricolis, etiâ à Septembri,
atque Octobri visum esse, quod à veritate est
alienum. Etenim si Cometa hic tamdiu appa-
ruisset, à Dodecamorio Scorpij, decimo-
quarto scilicet vel 15. gradu eius, procul dubio
processisset: hoc enim reliquus eius cursus
demonstrat. At Octobri Sol in illo signo fuit;
quare radijs Solis occultatus, & cum Sole de
die super Hemisphærium nostrum decurrès,
dubio procul videri nulla ratione potuit.

Ad nostram hîc Louanij notitiam non ve-
nit eius apparitio, nisi circa principium De-
cembri. Quo præcisè die ego eum primò
aspexerim, aut obseruauerim, non equidem
recordor. Cum hoc fuit, scio ipsum infra Ar-
cturū fuisse. Quo itinere eò venerit, ignoro.
Cum reliquum eius motum cōsidero, & qua
recti-

reſtitutione, ex quo cum diligentius obſeruauimus, ſemper ad Septentrionem perrexerit; veriſimile mihi fit, eum, vti dixi, à Scorpione per Bootis dextrum genu veniſſe. Inde paulatim adſcendit quā proxime ad illas ſtellas, quæ ſunt in lumbis Bootis: Inde non longè à ſtella quæ eſt in humero ſiniſtro Bootis: Inde valde prope illam, quæ eſt in ſiniſtro cubito Bootis: Inde medio loco inter vltimam ſtellā caudæ Vrfæ Maioris, & ſtellas quæ ſunt in ſiniſtra manu Bootis: Tandem per caudā Draconis, loco præciſè medio inter penultimā, & antepenultimam ſtellas caudæ eius, ad locum qui ferè medius eſt in rectā lineā inter ſtellam polarem, & maiorem in anterioribus cruribus Vrfæ, quæ vocatur Dubbe, iterque ad ſtellam polarem demonſtrat, peruenit. Vbi cum fuit, non amplius ſui paruitate, luminisque tenuitate viſibilis fuit, ſed planè ex oculis evanuit.

Die vndecima Decembris, quæ erat dies Martis, mane horā ſextā, ſtetit inter Arcturum, & ſtellā quæ eſt in dextro cubito Bootis. Cum ad meridianum noſtrum venit, fuerit in altitudine ſupra Horizontem ſexaginta quatuor graduum, remotus verſus Austrum à noſtro Zenith gradibus viginti ſex.

Die

Die decimâ quartâ Decembris manẽ, quæ erat dies Veneris, fuit paullulũ supra eas stellas, quæ sunt in lumbis Bootis, in rectâ fere lineâ inter Arcturum, & stellam quæ est in sinistro humero Bootis. Cum venit ad meridianum, fuit in altitudine graduum septuaginta circiter cum dimidio.

Die decimâ septimâ Decembris, quæ erat dies Lunę, distabat à stellâ, quæ est in sinistro cubito Bootis, quatuor circiter gradibus. Veniens ad superiorem meridiani partẽ fuit in altitudine octoginta duorũ circiter graduum, distans à Zenith nostro gradibus octo. Ex quo computando spacium quod confecit quotidie, liquet eum à die decimâ sextâ non amplius occidisse; sed semper supra Horizontem mansisse, totaque nocte, ac vespere visibilem fuisse.

Vigesimâ secundâ Decembris, quæ erat dies Sabbathi, vesperi horâ sextâ, visus fuit tenui lumine, & parvâ caudâ præditus, in rectâ lineâ inter vltimam stellam caudæ Vrsæ Maioris, & proximam ac infimam stellarum illarum, quæ sunt in sinistra manu Bootis; distans ab vltimâ stellâ Vrsæ Maioris tribus circiter cum dimidio gradibus. Veniens ad superiorem meridiani partem, fuit in altitudine octoginta nouem graduũ: proindeq; à Zenith

Zenith nostro distans non nisi vno gradu. Ascendit autem inter penultimam, & antepenultimam, vt dixi, stellas caudæ Draconis.

Vigesimâ quartâ Decembris fuit in extremitate parui (vt pingi solet) digiti sinistræ manus Bootis; in rectâ lineâ cum duabus anterioribus stellis caudæ Vrsæ Maioris. Veniens ad meridiani superiorem partem fuit in altitudine octoginta sex graduum cum dimidio circiter, distans à Zenith capitis nostri gradibus quatuor. Exinde non fuit amplius præ luminis sui tenuitate, vt dixi, visibilis; nisi acutissimo visu præditis, & locū, ad quem fere debuisset peruenisse, tramitemque eius callentibus: eò minus, quod vsque ad vndecimam Ianuarij coelum perpetuò nubibus tectum fuerit.

Vndecimâ ergò Ianuarij fuit iterum à me visus, & apparuit in rectâ lineâ inter stellam polarem, & superiorem stellam, quæ est in natibus Vrsæ Maioris. Sic vt cum ad meridiani superiorem venerit partem, debuerit fuisse fere in altitudine sexaginta sex graduum; distans à polo gradibus quindecim.

Adhuc fuit à me obseruatus decimâ octauâ Ianuarij, ferè iam inuisibilis; tumque fuit in rectâ lineâ inter stellam polarem, & stellam
lam

Iam Dubbe; fere medio loco, propinquiore tamen, ipsi stellæ Dubbe; illo loco, quò veniens ad superiorem meridiani partem fuerit in altitudine sexaginta, & vnus circiter graduum: proinde à polo distans decem gradibus. Ex eo tempore ne quidem fatigatissimis oculis eum amplius potui comprehendere: sed visum omnem excessit. Quapropter ei valedixi: promittens, quod proximo, vel ipsius, vel confratrum suorum, reditu omnè eius motū exactius essem obseruaturus. Nunc enim, quia radio Astronomico carui, cuius præcipuus in coelestium syderum dimensionibus est vsus: neque eius altitudinem supra Horizontem singulis inspectionis horis: neque exactam à reliquis stellis distantiam: neque certum modum irregularitatis motus eius, ita præcisè potui obseruare.

Cum primùm nobis apparuit, cauda fuit horrendæ magnitudinis. Nam cum adhuc circa Arcturum esset, tam fuit magna, vt rudi coniecturâ, ferè spaciū 45. vel 50. graduum videretur occupare. Paullatim vt ad Polum ascendit, atque à Sole remotior factus est, sicut ipse minus lucidus, ita quoque & cauda eius breuior euasit. Prout tamen cœlum fuit serenum, cauda quoque modo breuior modo longior apparuit.

Qua

Qua proportionedefecerit, ideo animaduerti non potuit, quod non rarò dies nebulosi .tres quatuorve, imò etiam quindecim, aut sedecim intercurrerint, quibus eius aspectus nobis fuit denegatus. A die 22. Decemb. ita pusilli luminis, caudæque fuit, vt non nisi acutissimo visu, longo intuitu, & non nisi ab eo, qui locum eius nouerat, motumque quotidiana inspectione fuerat persecutus, potuerit comprehendi. Motus eius absque dubio fuit irregularis. Primis temporibus, tres aut duos cum dimidio gradus quotidie confecit: vt deficere cœpit, & languere; pauciores: Adeò vt sub finem, vix vnum conficere potuerit.

Atque hæc sunt ERVDITISSIME D. PROFESSOR, quæ ego circa motum huius sideris potui obseruare. Qui si bene perpendatur, reperietur, quod à tempore, quo eum obseruaui, facile confecerit iter 70 graduum; quodque recto tramite motus fuerit, nec deflexerit; motuque suo descripserit portionem circuli magni; id est circuli transeuntis per centrum mundi; & sphæram in duas partes æquales secantis. Quodque ferè ab vsque Tropici ad Polum adscenderit, & ab Austro in Septentrionem, motum suum direxerit.

Porro

Porro quod ad eius attinet essentiam, & naturam, vtique eam definire, tum propter varias doctorum virorum opiniones, atque experientias; tum propter grauissimas rationes in contrarias partes militantes, difficillimum est.

Varij varia senserunt; quorum opiniones partim recensent partim refutât Plutarchus libro iii. de placitis Philosophorum capite ii. Aristoteles i. Meteor. capite vi. & vii. Seneca toto libro vii. naturalium Quaestionum. Aliqui dixerunt esse corpus cœleste, & sidus aliquod cœli, vt Pythagorici, Hippocrates Chius, Aeschylus, Apollonius Myndius: qui tamen adhuc in sua opinione in diuersa abierunt. Alij communem lucem ex concursu Planetarum, in longum productam, vt Anaxagoras, & Democritus: alij esse globum quendam materię cœlestis, qui aliquando à Sole illuminetur, & fiat visibilis, vt Cardanus lib. i. de varietate rerum capite 7. alij exhalationem quandam calidam, fumidam, pinguem, in supremâ aeris regione accensam, vt Aristoteles i. Meteor. capite 7. & qui eum secuti sunt Peripatetici plerique omnes: alij esse exhalationem quandam, non quidem igneâ, aut accensam, sed Solis lumine perfusam, & sic lucentem, vt Scaliger in Cardanum, exercitatione

citatione Lxxix. dixerunt. Mihi omnium opinionones examinare propositum non est: sed hoc solum, An Cometa sit corpus coeleste, & sidus aliquod; an verò Meteorum, & exhalatio ignita; & quod in idem recidit; an sit in coelo, an in aere. hæc enim se mutuò sequuntur, & cōuersuè dicuntur. Nam si est sidus, & corpus aliquod coeleste; ergo est in coelo, & è contra: si est Meteorum, & exhalatio incensa; ergo est in aere, & è contra: nemo enim dicet corpora coelestia, vel extra cœlum in aerem descendere; vel exhalationes elementares in cœlum adscendere.

Esse exhalationem accensam, præter Aristotelem tenuerunt etiam Xenophanes, & Epigenes, vt testatur Plutarchus loco citato; Alexander, Albertus, Auerrhoes, D. Thomas, Niphus, alijque plurimi. Regiomontanus magnus Mathematicus agens de Cometa anni 1475. conatus est demonstrare illum in aere, atque infra Lunam fuisse: ex quo sequitur fuisse meteorum, ac eiusmodi exhalationem accensam. Idem legitur demonstrasse quidam Ioannes Voghelinus de Cometa, qui luxit anno 1532. Porro ipsum esse exhalationem in aere accensam hoc argumento videtur probari. Vel Cometa est talis exhalatio accensa, & Meteorum; vel est corpus coeleste:

B

leste: non est corpus coeleste; ergo. Maior est vera; sequela est bona. Minor videtur posse probari varijs rationibus.

Primò. Si Cometa est corpus coeleste, quale est? estne aliquod corpus distinctum à natura stellarum, & siderum, an verò etiam stella? Si corpus aliquod distinctum, quale est, & vnde prouenit? si stella, qualis est? Non enim est stella fixa; quia mouetur: non erratica, quæ Planetæ appellantur: quia tales ab omni æuo notatæ sunt tantum septem: Cometa non est vnus ex illis. Insuper Planetæ omnes feruntur per Zodiacum, & ab Occidente in Orientem: cometa non; sed mouetur in omnem situm, ad Austrum, Septentrionem, Orientem, & Occasum; vt ex historijs, & descriptionibus Cometarum varijs est manifestum: & nominatim noster huius anni Cometa ab Austro præcisè in Septentrionem perrexit.

Secundò. Si Cometæ sunt stellæ; vel sunt stellæ, quæ semper fuerunt in cœlo, & cum mundo sunt creatæ; vel nunc primùm generantur cum apparent. Non fuerunt semper in cœlo ab orbe condito; quia si fuissent, semper quoque, & omni die sicut aliæ stellæ apparuissent. Nulla enim ratio esse videtur, quare vno tempore magis appaerent, quam alio:

alio : & cur minus quotidie apparerēt quam
aliæ stellæ. Non enim potest dici , quod vt
plurimum lateant sub radijs Solis , & ideo nō
videantur; sed solum tum, cū ex radijs So-
lis emergunt , vt Pythagorici asseruerunt.
Neque potest dici quod lateant in profunda
cœli altitudine, & ideo propter distantiam
non videantur; sed solum tunc, cum motu suo
ad imum cœli descendunt , vt dixit Apollo-
nius Myndius : quia hæ opiniones , tum ab
Aristotele , tū à Senecâ locis citatis sunt effi-
catiter refutatæ. Non generantur etiam de
nouo : quia in cœlo non sunt generationes,
aut corruptiones ; neque vnquam in cœlo
vlla percipitur mutatio. Cœlum enim, vt in-
quit Aristoteles 1. de Cœlo, capite 3. textu 20.
est ingenerabile, & incorruptibile. Denique
aliæ stellæ non generantur , neque corrup-
puntur , sed in eodem semper statu perma-
nent, & ab orbe condito huc vsque perseue-
rauerunt. Quare & Cometæ perseuerare de-
berent , si eiusdem cum alijs stellis naturæ es-
sent. Videtur enim quod eadem communis
aliarum omnium stellarum natura, & condi-
tio eis quoque competere deberet.

Tertio. Cometæ augentur, & minuuntur:
hoc non competit sideribus ; quia illa in ea-
dem semper permanent magnitudine ; ergo.

Quinimmo hoc videtur esse euident argumentum, Cometæ esse exhalationes accensas, & ignem quendam: qui vt primum accenditur, minor est; & prout fomes capit incrementum magisque accenditur, ita paulatim maior apparet; & cum iterum fomes incipit deficere, ac materia est pæne exusta, paulatim iterum minuitur, quousque tandem in totum euanescat.

Quartò. Cometæ differunt figurâ ab alijs stellis; ergo. Etenim aliæ stellæ omnes sunt rotundæ; Cometa est longus. Longitudo non est figura competens cælestibus corporibus, sed rotunditas. Imò illa longitudo videtur esse argumentum, quod Cometa sit exhalatio accensa. Nam vt exhalatio è terrâ in longum adscendit, ita cum accenditur, igne motu suo alimentum prosequente, videtur quod necessariò debeat figuram longi ignis acquirere.

Quintò. Siderum motus est regularis, & eodem ferè tenore semper feruntur: at Cometarum motus est irregularis: quia sapissime animaduersum est diuersis diebus ipsum inæqualia spacia emetiri: alijs, promoueri ad vnum tantum gradum; alijs, ad duos tresve; etiam ad quinque: sicut de Cometâ anni septuagesimi septimi scribit celeberrimus Tycho

Tycho Brahe ii. Vranix suæ.

Sextò. Stellæ non sunt pellucidæ, vt per eas possit videri; sed per Cometas potest videri: nam per caudam Comeræ videntur stellæ fixæ, quæ sunt supra ipsam: etiam in hoc Cometâ frequenter licuit videre stellas per caudam eius translucens; ergo.

Septimò. Videtur dicendum omnes Cometas esse eiusdem speciei. nam singulos à se mutuo specie differre gratis, & sine ratione dici videretur. Omnes enim sunt longi, eadem figurâ, & lumine præditi; cum tali capite, cum tali caudâ: quæ identitas accidentium videtur indicare identitatem specificam. At si essent eiusdem speciei, non possent habere motus tam diuersos. Constat enim vnumquemque proprio, ac peculiati motu, ab aliorum motu diuerso, fere semper visum esse moueri. At nullo corpus simplex tam diuerso motu, & quidem proprio, ac per se præditum esse potest. Quapropter hoc potius indicium est, Cometam esse exhalationem accensam; quæ in quam partem vergit, aut in quam partem ab aliquo Planetâ trahitur, eò igne alimentum suum sequente fertur.

Octauò. Si Cometæ essent in Cœlo; cum

vnus Cometa huc, alius illuc, & vnusquisque in diuersum situm moueatur, sequeretur, quod cœlum esset liquidum; & quod Cometa deferretur per cœlum, sicuti pisces per aquam. Tales enim Cometæ non possunt dici moueri motu alicuius orbis, cui insint; sed solum seipsis. Tam diuersos enim orbis, tam contrarios, ac diuersos immò etiam irregulares motus habentes statuere omnino absurdum ac ridiculum foret. Atqui falsum est cœlum esse liquidum; nam in sacris literis ca. 37. Job habetur quod cœli sint solidi, sicut ære fusi. Deniq; sequeretur, quod etiâ eodẽ modo Planetæ per cœlũ mouerẽtur: & consequenter quod nulli essent cœli; sed quod esset vnũ continuum liquidum corpus, à terrâ vsque ad inania spacia, per quod sidera vagarentur. Quod doctrinæ Aristotelicæ, & communi Philosophiæ; immò etiam sacris literis, quæ frequenter cœlos in plurali numero nominant, videtur repugnare.

Secundò principaliter probatur hæc opinio Multi ignes nobis apparent similitudinẽ cum Cometâ habentes, quos visus noster iudicat esse in cœlo, & tamen sunt in ære, & certò sunt meteora, atque exhalationes accensæ, vt Lanceæ, Trabes, fulgura, stellæ cadentes; ergo idem de Cometâ est iudicandũ.

Hiscẽ

Hiscæ tamen non obstantibus, opinio mea est, Cometæ esse in cœlo, & esse corpora cœlestia, & minimè meteora aut exhalationes in aere accensas. Hanc opinionem tenuerunt plurimi magni viri, Anaxagoras, Democritus, Pythagoras, Diogenes, Apollonius Myndius, Hipparchus, Hippocrates Chius, Æschylus, alijque; vt Plutarchus, Aristoteles, Seneca locis supra citatis testantur. Qui ipse quoque Seneca eam tenuit, & fortiter probauit. Præter hos inter Arabes fuerunt Messahala, Haly super secundum quadripartiti Ptolemæi, & Albumazar, qui anno Domini 844. Cometam à se supra Veneris orbem visum esse testatur. Inter recentiores sunt Tycho Brahe, Mathematicorum Princeps, & acerrimus obseruator, qui libro ii. sue Vranix, tenuit & probauit Cometam anni 77. supra regionem elementarem, atque in cœlo fuisse. Idem ostendit Cornelius Gemma, in sua Physicâ, & Mathematicâ de Cometâ anni 77. apodixi. Idem Michael Mæstlinus in suis de Cometâ anni 80. obseruationibus in lucem editis. Idem tenuerunt Cardanus libro iv. de subtilitate, Marcellus Squarcialupus Regis Poloniæ, & Hagecius ab Hayck Imperatoris Medicus in suis de Cometis libellis, ac dialexibus. Probatur porrò ratione.

Cometa non est in aere, neque est exhalatio ignita, ergo est corpus cœleste. Sequela est bona: Antecedēs probatur varijs argumētis.

Primò. Cometa, qui nobis nunc attulit, affecutus est perfectè motum primi mobilis: vt ex eo patet, quod ab Austro, recto tramite adscenderit versùs Septemtrionem. Etenim si à motu primi mobilis multum retrò fuisset relictus, non potuisset tam recto tramite ad Septemtrionem vergerè, sed plurimum ad latus, & ad Orientem debuisset deflectere. Itaque concesso quod non fuisset in cœlo; saltem ex eo sequitur, quod fuerit valde propè cœlum. Nam quæ à cœlo multum distant, non possunt vi raptus tam efficaciter & celeriter circumduci: Atqui ad locum tam altum non possunt perstringere exhalationes; ergo. Minor probatur: Nubes ac vapores, vt doctiores Mathematici, tum ex vaporum in crepusculis eleuatione, tum ex duratione colorum in cœli nubibus post occasum Solis, ostendunt; non vltra duodecim, aut trèdecim milliaria Germanica in altum adscendunt; ergo neque exhalationes. Et vt concedatur quod exhalationes ob suum calorem paulò altius adscenderent; tamen illa differentia non potest esse vllijs momenti, & non nisi duorum, trium, quatuorve millia-

milliariorum; quod nihil facere potest ad illam immensam altitudinem, in qua absque dubio hic Cometa, & multi alij, qui motum diurnum exactè sunt assecuti, fuerunt constituti. Poterit dici ascendere exhalationes tam altè non virtute propriâ; sed tractas per vim aliquo Planetâ, aut efficacissimo sidere. Sed hoc verû non est. Etenim non à Planetâ; quia in hoc Cometâ manifestum est, eum à nullo Planetâ fuisse attractum: quia à loco Planetarum siue Zodiaco planè recessit versus Septemtrionem. Non ab alio sidere: quia si ab alio tractus fuisset, quando ad illius locum peruenisset, ibi permansisset. At hic Cometa rectâ vsque ad Polum omnes stellas pertransiuit. Ibi autem nullæ magnæ stellæ sunt à quibus trahi potuerit; præterquâ quod stellæ quæ apud Polum sunt, tam sint remotæ à loco in quo primum Cometa exarsit, vt, earum virtus vsque ad illum locum pertingere non potuisset. Porro quod sidera non possint tam altè exhalationes trahere, inde manifestum est, quod nunquam videamus tam altè nubes, aut vapores trahi. Si enim exhalationes ab aliquibus sideribus tam altè traherentur, vtique & vapores, & nubes eadem ratione ab alijs tam altè aliquando trahi possent. Accedit quod

non videatur, quomodo exhalationes calide transire possint mediam ac frigidam regionē aeris, sine eo quod illic alterentur, destruantur, includantur, & in fulmina tonitruaque conuertantur.

Secundò. Cum Cometa hic noster fuerit loco tam alto, vt ostensum est, absque dubio eius cauda debet fuisse immensæ magnitudinis : Nam cum occupauerit in cælo bene XLV. aut plures gradus, debet fuisse multorū millium; imò plusquam centum mille milliariorum. At non videtur possibile, tantam exhalationis quantitatem, è terrâ in altum potuisse attolli, quæ non solum vastū illud corpus constituerit, sed etiam ei tanto tempore pabulum suppeditarit: ne quidem etsi tota terra in exhalationes conuersa fuisset; ergo.

Porro tanta quantitas fumidarum, ac terrestriū, & viscosarum exhalationum loco illo supremo constituta deberet ibi esse visibilis, & deberet apparere in modum nigræ, & opacæ nubis, & deberet sidera quibus subicitur, & ipsum etiam Cometā frequenter obscurare, & offuscare, sic vt à nobis videri non possent: maximè, cum, vt dicunt, exhalatio illa primū supernâ sui parte accendatur. Et enim inferna pars nondum accensa, quando intercurret, inter visum nostrum, & partem accen-

accensam, frequentissimè ipsam partem accensam adeoque Cometam deberet eclipsare: At hoc nunquam factum fuit, neque à quoquam factum proditur; ergo. Quin è contra manifestum est, quotiescunque dies est serenus, & cœlum nubibus minimè tectū, semper Cometas perspicuum apparere, & loca omnia circa Cometam clara, & perspicua, nullisque exhalationibus impedita videri; & vicinas omnes, ac circumiectas stellas perfectissimè apparere.

Tertiò. Si Cometa esset exhalatio; cum exhalatio sit substantia mobilis, facile diuisibilis; illa pernecitate motus diurni, quo 24. horarum spacio circa totum terrarum orbē vertitur, deberet separari, disijci, dissipari: hoc non apparet; ergo. Cometa enim totus manet semper vnitus, eodem modo seruans omnes suas partes simul, ac eadem figurā; sine eo quod aliqua hac, aliqua illac disgregerentur.

Quartò. Si esset exhalatio, non haberet figuram rectam, sed potius globosam: quia exhalationum, & vaporum est conglobari, vt patet in fumo ignis, candelæ vaporibus, nubibusque. At cauda Cometæ protenditur in longum per rectos radios, & nunquam conglobatur; ergo. Denique, si esset exhalatio accensa,

accensa, non semper seruaret eandem figurā: sed prout ignis modo hac, modo illac excurrit ad suum alimentum, deberet exhalatio illa interdum magis ardere ad dextram, interdum magis ad sinistram; interdum magis in hoc extremo; interdum magis in opposito. Interdum deberet cauda attenuari in hoc extremo, in altero augeri; interdum è contra. Et interdum lumen esse maius in hac parte, & hoc extremo caudæ, interdum magis in opposito. At ita non est; sed semper Cometa sese habet eodem modo, & eandem figurā semper in vno extremo est globus instar stellæ, & nunquam in alio. Semper ab illo globo exit cauda, primò angustior, inde in progressu paullo latior.

Propè globum Cometæ, semper lumen est intensius, paullatim versus caudam extenuatur, flaccescit; ita vt paullatim in nihilum euanescat. Immò hoc est euidentissimum signum, quod cauda Cometæ non sit aliquis ignis; sed sit splendor quidam & radij luminis à Cometâ prodeuntes; sicut infra latius ostendetur.

Quintò. Exhalationes, cum sint valde leues ac mobiles, in liquido, & inquieto, ac naturâ suâ mobili aere, huc, illuc, temerario

rario admodum motu mouentur, ac fluctuant; nunquam quiescunt in eodem loco; modò in hanc, modò in aliam partem deferuntur: At Cometa hic noster certo motu semper delatus fuit; ergo.

Sextò. Ignita meteora non diu durant, sed statim tota simul accenduntur, vt inquit Seneca; & breuissimo tempore exstinguuntur. Exhalationes enim ob sui tenuitatem ab igne statim totæ simul inflammantur; vt patet in fulmine, trabibus, virgis, facibus, stellis cadentibus, &c. At Cometæ diu durant. Nam, vt inquit Aristoteles, ad minimum durant septem aut octo diebus; interdum tribus mensibus, medio anno, vel etiam anno vno; vt ex varijs Cometarum descriptionibus ab Auctoribus traditis est manifestum. Etenim Cometa, qui supra Hierosolymam apparuit, ante excidium eius, anno integro durauit; vt auctor est Iosephus libro septimo, de bello Iudaico. Refert Seneca libro septimo quæstionum naturalium capite vigesimo nono, de Cometâ alio, qui medio anno perdurauit.

Septimò. Omnis ignis flamma scintillat: quod fit propter partium eius inæqualem

æqualem motum, ac distractionem, & inæqualem quoque accensionem ac inæqualem splendorem: At Cometa non scintillat; ergo non est ignis.

Octauo. Ignis motu proprio mouetur per lineam rectam: Cometa, motu proprio (nam de diurno, cum non sit motus Cometæ per se, sed tantum per accidens non loquor) mouetur circulariter. Hic enim noster iam cœli quadrantem confecit: & ille de quo loco iam citato scribit Seneca, sex mensium spacio, cœli medietatem decurrerat: adeo que in orbem vterque iuit. Affert hoc argumentum Seneca libro 7. naturalium quæstionum capite 23. & quidquid de alijs sit, duo saltem, inquit, tempore nostro sic motum suum in orbem duxerunt.

Nono. Exhalationes debent prius accendi parte supernâ, quam infernâ; eò quod illâ parte sint viciniore cœlo, aut elemento ignis, à quo secundum Peripatericos accenduntur: vnde, si Cometa esset ignis, deberet semper descendere deorsum, ac versus terrâ; prosequendo pabulum suum quod est ab infra: & ita cum durante ad multos annos Cometa debeât continuæ è terrâ surgere exhalationes, quæ Cometæ pabulum præstent; deberet Cometa, vt inquit Seneca, aliquando
ad

ad terram vsque descendere. Immò videtur, quod propè terram semper deberet exstingui; eò quod ibi sit finis pabuli eius. At hoc non fit; quin potius cùm pereunt, omnes videntur in altum ferri; ergo. Denique. Cometæ deberent aliquando generari propè terrā ac in mediā aeris regione. Nam cùm ibi frequenter plurimæ exhalationes congregentur, & accendantur, vt patet in fulmine, atque alijs meteoris ignitis; sequitur quod ibi accensæ exhalationes deberēt tam bene Cometæ figuram, ac naturam referre, quam accensæ in supremā aeris regione. Quæ enim ratio esset, cur accensæ in supremā aeris regione magis fierent Cometæ, magisque Cometæ figuram ducerent, quam in infimā? At hoc nunquam fit. Nam si hoc fieret, talis Cometa nunquam occideret: quia propter distantiam à primo mobili, raptu diurno non moueretur; & sic nunquam moueretur nisi motu venti: & quando serenus, ac tranquillus esset aer, deberet stare immobilis, & non moueri alio motu, quàm temerario motu ignis pabulum suum sequentis. Tales Cometæ nunquam sunt visi; ergo.

Decimò. Si Cometæ constarent talibus exhalationibus, per intervalla dierum, ac Septimanarum, deberent esse modo minores, modo

modo maiores: prout vno die aut septimanâ plus, aliâ minus pabuli atque exhalationum è terrâ efferretur. Hoc non fit, sed parili tenore capiunt incrementum, cum exoriuntur; & decrementum, cum intereunt: nulla alterna dierum, aut Septimanarum mutatione; ergo.

Vndecimò Si Cometæ constarent exhalationibus; non possent habere longinquum motum; nec possent recedere ab illo loco, seu ab illa regione, super quâ habuerunt originem: quia quando recederent ab illâ, deberent statim exstingui; at hoc non fit: quia Cometæ decurrunt super vertice variarum, ac distantissimarum regionum. Etenim hic noster Cometa decurrit super medietate orbis terræ: Decurrit à regionibus quæ sunt sub Æquinoctiali; vsq; ad regiones quæ sunt sub Polo; proindeque ad regiones bene bis mille, plus minus, milliaribus inter se mutuò distantes. Cometa de quo scribit Seneca libro 7. capite 29. sex mensium spacio totam terræ medietatem circumiuit. Maior probatur, quia quando ab illa regione recederent, & decurrerent super vertice aliarum regionum, longè distantium, non reperirent ibi neque præcisè in illa altitudine, qua decurrunt, paratas exhalationes, à quibus possent foueri,

foueri, & sustentari; proinde deberent extinguere atque interire. Nam etsi, ubi primum fuerunt exorti; fuerit congregata magna quantitas exhalationum, à quâ ipsi potuerint generari, ac produci: tamen in aliâ regione ad quam veniunt, & super quâ decurrunt, non erit illa; vel non erit tanta, ut ab eâ possint sustentari, & continuari. Et ut esset, ibi adhuc tanta; non esset tamen præcisè ad eam aeris altitudinem eleuata, per quam Cometa decurrit, & in quâ posset à Cometâ attingi, & absorberi. Nam pone casum, quod ortus, & accensus esset Cometa, super Angola Congo, Mamecogo, &c. ex exhalationibus in illis regionibus in aerem eleuatis; quando talis Cometa cursu suo perueniret in Hispaniam, regionem nostram, aut regiones sub Polo constitutas; non reperiret præcisè eo tempore, quo eò aduentaret paratas exhalationes, à quibus posset sustentari, quasi disposita ibi esset in aduentum eius annona, qua nutrireretur, ne miser alimento destitutus, fame moreretur. Non enim eodem tempore, in omni regione, eiusmodi exhalationes semper attolluntur; & quamuis attollerentur, ad æquè determinatam altitudinem attolluntur. Etenim in vnâ regione ad quam

perueniret, esset frigus, in aliâ calor; in vnâ æstas; in aliâ hyems; vna humida, alia sicca. Quæ omnes non sunt æque producendis exhalationibus idoneæ. Immò videtur, quod Cometa non posset, super Oceano decurrere, sed ibi deberet interire: quia exhalationes generandis Cometis idoneæ non ex mari, sed ex terra eleuantur. Hic Cometa decurrit super regionibus verisimiliter, primò sub Æquinoctiali, inde sub Tropico, inde sub circulo Antarctico & tandem sub Polo constitutis; calidissimis, temperatis ac frigidissimis; in quarum alijs fuit hyems, in alijs æstas: super Guinæa, Lybia, Barbaria, Hispania, Germania, Moscouia, Tartaria, Russia, Islandia, alijsque sub Polo constitutis. Quis credat omnibus illis locis, semper & eo præcisè tempore, quo super vertice earum decurrit, paratas fuisse exhalationes, quibus aleretur, ac sustentaretur. Dices, forte exhalationes per modum viatici, ex loco in quo primam habuit generationem, cum ipso rapi, ijsque nutriri, & sustentari; neque necessum esse, vt in singulis ad quas peruenit, regionibus, eas sic paratas, ac quasi prædispositas inueniat. Sed responsio non valet: quia non potest sustentari Cometa exhalationibus ijs, à quibus

quibus primò est productus : quia illæ statim simul , & semel inflammantur , & consumuntur, vt in fulguribus, & alijs meteoris ignitis, quæ vno ictu inflammantur , & statim extinguuntur, est manifestum: sed ad suâ sustentationem debet habere nouas exhalationes quotidie de nouo excitatas ac quotidie de nouo à terra adscendentes.

Atque his argumentis videtur euidenter probatum Cometam non esse exhalationem accensam, aut meteorum : proinde sequitur esse corpus cœleste, atque esse in cœlo. Quod etiam proprijs argumentis sic potest probari.

Primò, motus rectus est proprius corporum sublunarium ; circularis cœlestium : ac Cometa mouetur motu circulari, vt supra est ostensum; ergo.

Secundo, Cometa hic noster motu suo descripsit in cœlo portionē circuli magni, id est circuli traseuntis per centrū mūdi, & secantis mundū in duas partes æquales: talē circulū describere videtur esse proprium corporum cœlestiū; ergo. Etenim si animaduertatur, quomodo hic Cometa ascenderit à dextro genu Bootis, per stellas quæ sunt in lumbis Bootis ad vsque locum medium inter stellas sinistræ manus Bootis, &

ultimam stellam caudę Vrſę Maioris; & inde vſque ad medium lineę, quę ducitur à ſtellâ Polari, ad ſtellam Dubbe; inuenitur quod confecerit portionem circuli perfectè magni. Idem fecit Cometa anni 77. eoq; argumento Tycho Brahe II. Vranię probauit eum quoque coeleſtem fuiſſe.

Tertiò. Hic Cometa exactè aſſecutus eſt motum primi mobilis; ergo eſt in cœlo. Sequela probatur: quia, ſi eſſet in regione elementari, nō potuiſſet tam celeriter ferri, atque ipſum cœlum. Quia, quod per raptum fertur, propter viciniam, & per vim; non poteſt tam celeriter ferri, ſicut illud quod fertur primò & per ſe, & ex proprietate naturali: quod autem tam celeriter latus fuerit, ſupra eſt oſtenſum. Etenim ſi non tam celeriter latus fuiſſet, retrò relictus fuiſſet, & contendiſſet quotidie motu proprio verſus Orientem. Quod ſi factum fuiſſet, non potuiſſet hic per rectam lineam ferri ab Auftro ad Septentrionem; ſed ſemper ad latus & verſus Orientem abreptus fuiſſet. Immò hoc argumento videtur convinci poſſe, fuiſſe ſupra Lunam. Etenim quod perfectius aſſequitur motum primi mobilis, quàm Luna; hoc eſt ſupra Lunam;

nam ; nam si esset infra , sequeretur , quod
virtus raptus primi mobilis, moueret cele-
rius distans, quam propinquum; quod fieri
non potest. At Cometa hic noster celerius
afsecutus fuit raptum primi mobilis quam
Luna: etenim Luna quotidie retrocedit ad
Orientem , seu post relinquitur à primo
mobili ad tredecim gradus. Cometa verò
noster ad Orientem non tetendit ; sed re-
ctà ad Septemtrionem : & sic ne vno qui-
dem gradu post relictus fuit. Immò quoti-
die proprio motu non promouit , nisi ad
duos, tresve gradus, vt supra est ostensum.
Quare etiam si rectà in Orientem latus
fuisset , non potuisset ad summum nisi illis
duobus ; tribusve gradibus retro relictus
fuisse ; quod longè minus est, quàm quotidie
tredecim retrò relinqui ; sicut Lunæ con-
tingit. Scribit Seneca libro 7. capite 29. de
Cometâ , qui sex mensium spacio medium
orbem circumiuit. Ille Cometa, esto quod
rectà in Orientem delatus fuisset, non nisi
vno gradu quotidie retrocessisset. Carda-
nus libro 4. de subtilitate scribit de Come-
tâ anni 1532. quod in septuaginta , & vno
diebus non retrocesserit ad 73. gradus:
proindeq; quod quotidie non retrocesse-
rit nisi ad vnum gradum; cum Luna quoti-

die retrocedat ad quindecim; ex eoq; colligit cum Cometam supra Lunam fuisse.

Quartò. Vidi hunc Cometam vna eademque nocte non rarò bis velter, vt dixi, nimirù vesperi horâ septimâ, nocte mediâ & mane horâ quintâ vel sextâ: adeoque existentem demissum ac Horizonti propinquum & valde sublimé atq; ab Horizonte remotum; & tamen nullam in eo potui percipere parallaxim aut distantiae situsue ad stellas fixas sibi vicinas varietatem: nisi solum illam, quam eius proprius versus Septentrionem motus, (qui à parallaxeos ratione est excludendus) inducit. Hoc autem signum est eum in cœlo fuisse. Quia cum visus noster non sit in centro terræ sed in eius circûferentia; si Cometa in aere ac loco terræ propinquo cõstitutus fuisset; vtique manifestam aliquâ parallaxim ac aspectus ad alias stellas differentiâ habere debuisset.

Verum non sufficit varijs. argumentis hanc sententiam comprobasse, nisi contrariæ quoq; opinionis argumenta soluantur. Ad ea ergo sic respondeo.

Ad primum, negando minorem. Ad primam, & secundam eius probationem; dico: rationibus iam in mediâ allatis, satis manifestum esse Cometam esse in cœlo, & esse

esse corpus cœleste. Quale autem sit, ego quidem dicere non possū, non magis, quā tot magni viri, qui ante me fuerunt. Quia autem dici non potest quid sit, ex eo non sequitur, quod præcisè sit hoc vel illud; vel quod sit talis exhalatio: multa cognoscuntur negatiuè, quæ non cognoscuntur affirmatiuè. De Deo, de animâ, de siderib. omnibus, scitur quid non sint; sed non scitur quid sint. Miraculū verè est naturæ, idoneū ingenijs nostris torquendis, quod admirari debemus, cognoscere nunquā poterimus. Quis scit, quid in cœlo agatur, quæ ibi corpora, quæ substantiæ nobis inuisibiles adhuc sint, & quæ ibi quotidie forte fiant permutationes? Omnis notitia nostra de siderum cœlorūq; substantiâ & virtutibus, ac permutationibus, excepto motu, & Solis, Lunæq; effectibus, qui sub sensum cadunt; non est nisi coniectura. Quis scit, an de nouo Deus fidus illud creet miraculosè in terrorem hominum & maiestatis suæ declarationem? An ibi naturaliter per interualla temporum, ex materiâ, & efficiente nobis incognitis generetur? An sit stella aliqua fixarum ex altioribus; iisque quæ minus sub visum nostrum atq; obseruationem cadunt, quæ aliquando propter causas

nobis ignotas è suis sedibus ejciantur, migrantes per cœlum, donec iterum vel propriam suam sedem, vel aliam naturæ suæ conuenientem repererint; tali substantiæ modo præditæ, vt per eas magis quam per alias Solis lumen transeat; qua ratione caudam trahant? An verò sit aliud peculiare genus Planetarum, distinctum à septem illis maioribus, qui per altissima coeli loca, circulo orbi nostro excentrico delati, cum ad imum motus, ac prope terram descendunt, fiant visibiles: cum vero iterum in altum adscendunt, captum oculorum euadât, sicque exstingui nobis videantur, vt Apollonius Myndius, referente Senecâ, ex Chaldæorum doctrinâ asseruit: quique numero plures cum sint, singuli proprijs motibus præditi per interualla temporis nobis incognita, modò hic, modò alius, ad orbem nostrum descendant? Equidem opinio ista, non est adeo absurda, vt prima fronte videtur, ac Seneca eam iudicat. Plures enim quam septem Planetas in cœlo reperiri, nihil miri est. Non constituti sunt nisi septé, quia non plurium motum oculus noster aduertere hætenus potuit. Sed quid impedit adhuc multò plures eosque paruos esse, qui videri à nobis, quorumque motus obseruari

seruari minime potuerit. Ita esse tandem quoque seculo nostro docuit Galilæus Galileius, qui beneficio dioptræ Batavicæ, adhuc tres paruos, ac nouos Planetas adinuenit, perpetuò circa Iouem decurrentes; quos sidera Medicæa ac Iouis satellites appellauit. Motus irregularis, seu inæqualis Cometarum aliquam fidem huic opinioni adstruere videtur. Nam cum Cometa noster maximus apparuit, eius motus fuit celerissimus: ut minor euasit, factus quoq; fuit valde lentus. An hoc est, quod quando terræ propinquus fuit, motum habuit transuersum; quando verò in altum redijt, magis rectum? Etenim quæ in transuersum mouentur, celeriter moueri, & magnum spaciū conficere: quæ verò in rectum à nobis recedunt, vel ad nos accedunt vix moueri, exiguumq; spaciū pertransire; immo quodammodo stare videntur. Quod Seneca libro 7. naturalium quæstionum cap. 18. huic opinioni objicit, quod sic sequeretur, quod quando Cometæ incipiūt apparere, primū, parui esse deberent, & prout ad nos descendendo accedunt, paulatim maiores, maioresque fieri; cuius contrarium experientia docet; ex eo quod plerumque cum primū nobis apparent, statim

tim maximi sint, paullatim minuantur, nullius est momenti. Potest enim hoc ex alijs caussis contingere. Vel quia cum inceperunt crescere, radijs Solis, vel coeli nebulositate tecti fuerint; vel supra nostrum Horizontem non adscenderint; vel solum adscenderint de die, cum videri non potuerunt; sic vt nō prius videri potuerint, quā magnitudinis suę omne incrementū essent adepti. Sed & frequenter paullatim sicut decrementum, ita & incrementum capere visi sunt: ipsemet Seneca 7. natural. ca. 15. scribit Cometam qui regnante Attalo in Macedonia conspectus fuit initio modicum fuisse, sed postea ita adauctum, vt se quā latissimē diffuderit, totamq; viam lacteam compleuerit. Et Iouianus Pontanus super Centiloquio Ptolemæi, scribit se vidisse Cometam admodum breui capite, & comā, sub initiū, qui postea in tantam excreuit magnitudinem, vt 50. graduum spacium in coelo occuparet. Interim tamen quid verē Cometa sit, fateamur liberē nos ignorare; haec solum scientiā contenti, quod non sit Meteorum aut *ἀναδυμναστis* ignita, sed cæleste corpus, & de naturā siderum. Coelum esse ingenerabile, & incorruptibile non est articulus fidei; sed axioma valde incertum, quod ea facilitate potest

potest negari, quâ ab Aristotele est assertum; eò quod nulla valida ratione possit demonstrari. Neque quidquam est dicere, quod nulla unquâ in cœlo permutatio animaduertatur: quia hoc in primis falsum est: & ut verum esset, parum efficaciter cœli ingenerabilitatem, aut incorruptibilitatem probaret. Possunt enim maximæ generationes, & corruptiones, maximæque permutationes in cœlo fieri, etiamsi à nobis non conspiciantur. Hoc visus nostri debilitas, & imensa cœli distantia faciunt; nec magis permutationes, aut generationes vllas in hoc mundo inferiore videremus, si in cœlo Lunæ constituti essemus (in quo tamen nunc propter viciniâ, & propinquitatē admirabiles quotidie fieri animaduertimus) quàm modò in cœlo videmus. Quod autē falsum sit nullâ in cœlo fieri permutationē, docet Cometæ, de quibus quæstio est, quos iâ tot efficacibus argumentis in cœlo esse ostendimus. Docent insuper & novæ stellæ, quæ in cœlo apparuerunt. Tēporibus Hipparchi novâ stellâ in cœlo apparuisse scribit Pl. l. ii. c. ii. scribit Haly super 11. quadripartiti Ptolemæi c. 9. suo tēpore novâ stellâ apparuisse in 15. gradu Scorpij supra orbē Veneris, quâ ipse cū alijs viris sapiētibus cōspexerit; quæ
tan-

tantæ erat claritatis, vt tantum super vniuersum Horizontem effunderet luminis, quantum quarta pars Lunæ effundere potuisset, quæque in cœlo quatuor mensibus perseuerauit. Anno 1572. in signo Cassiopææ, quatuordecim integris mensibus apparuit noua stella tantæ claritatis, vt omnes alias stellas luminis sui splendore superaret. De quâ Cornelius Gemma Prædecessor noster, alijque libros in lucem ediderunt. Sed transeo ad alia argumenta.

Ad tertium ergo respondeo; forte augeri, & minui: fortè non verè augeri, & minui; sed ita solum oculis nostris propter eorum accessum, vel recessum apparere. Vt vt sit, fateor in Cometis multas reperiri conditiones, ac proprietates alijs sideribus non communes: sed ex quibus tamen non conficitur, ipsos cœlestia corpora non esse, aut esse Meteora; sed hoc solum: esse cœli miracula, qualia & in terris non pauca reperiuntur.

Ad quartum respondeo; Cometam non esse longum, sed rotundū, sicut aliæ stellæ. Longitudinis apparentiam facit cauda, quæ non est pars Cometæ; nec est substantia, aut *ούσιας*, sed solum *εἰσπαύς*, & splendor quidam luminis Solis per Cometā diffusi.

Qua-

Quapropter inuerti potest argumentum:
& quia alias stellas figurà, lumine, & situ re-
ferr, colligi eiusdem cum illis naturæ esse.
Quod cauda nihil aliud sit quam radius ac
splendor luminis asserit Seneca lib. 7. ca. 26.
& probari potest varijs modis. Primum
sensu: quia visus noster in hoc Cometa val-
de euidenter potuit iudicare caudam illam,
non ignem; sed splendorem quendam lu-
minis esse, qualis animaduertitur radijs So-
lis per fenestram cubiculū subintran-
tibus. Secundò, quia stellæ fixæ transparuerunt
per caudam eius: nam si cauda fuisset exha-
latio accensa; videtur quod non potuissent
transparere: quia tanta moles fumidarum,
ac terrestrium exhalationum accensa ne-
cessario debuisset habere aliquam opacita-
tem coniunctam, quæ specierum visibiliū
ipsorum siderum transitum impedire de-
buisset. Tertiò, quod illud lumen caudæ
producatur per lineam rectam: quo modo
exhalatio se continuò per aerem extende-
re minimè posset. Quartò, quod in caudā,
& nominatim in caudā huius nostri Come-
tæ diuersi, & distincti radij luminum, alij
alijs luminosiores, per longitudinem caudæ
rectā decurrentes potuerint animaduerti,
eodem modo, quo & in lumine Solis per
fene-

fenestram subintrante, eiusmodi radiorum diuersitas animaduertitur.

Quintò, quod hoc lumē apud caput Cometæ fuerit angustius, adæquans Cometæ magnitudinem; in progressu verò magis, magisque fuerit dilatatū: sicuti videmus in lumine Solis aut candelæ per angustum foramen transeuntis: hoc enim apud foramē per quod ingreditur, æquale est magnitudini foraminis, in progressu dispergitur, ac dilatatur.

Sextò, quod illud lumē caudæ apud Cometam fuerit intensius, paulatim vero in progressu ita fuerit attenuatum, vt tandem suauiter in nihilum euanuerit. Hoc enim proprium luminis est vt apud ipsum luminosum sit intensius, in progressu verò paulatim magis, magisque flaccescat. Quod ita fieri non posset, si cauda Cometæ esset exhalatio. Prout enim illa inæqualiter arderet, modo magis ab hac parte, modo magis ab aliâ; prout vno loco plus, densiusq; esset pabulum, quàm alio, necessario lumen inæqualiter intensum, modo intēsius in hoc extremo, modo in alio, modo in medio, modo in hoc latere, modo in alio esse deberet.

Probatur Septimò, & quidē caudam esse splendorē luminis Solis; ex eo, quod cauda
sem-

semper Soli sit auersa : quod vt Cardanus lib. 4. de subtilitate, & Appianus, & Gemma Frisius animaduenterunt ; ita in hoc nostro Cometa semper fuit animaduersum. Nam cū Sol erat in Oriente, cauda Cometæ vergebat versus Occidentē; cum in Occidēte, versus Orientem, ac prout Sol motu suo gyrauit, ita quoque caudam suam in alium, atque alium mundi situm dirigebat.

Poterit forte dici caudā Cometæ esse quandā flammā tenuiorem ex ipso corpore seu capite Cometę tanquā igne quodā densiore ac solidiore euolitantē; eo modo, quo videmus à ligno accenso seu carbonibus flammā euolare, quæ ijs per modum caudæ adhæret & in altū assurgit. Sed doctrina nō valet. Quia flāma omnis ex natura sua sursum vergit : Cometæ autē cauda sursum nō vergit : quia, si sursum vergeret, deberet semper in directum obijci oculis nostris, & semper secundum sui longitudinem consistere in rectā lineā ab oculo nostro tanquam terræ centro per Cometæ corpus ad coeli circumferentiam ductā. Per talem enim lineam, tanquam per circuli radium protendi, est rectā sursum ferri. At sic cauda non protenditur: quia si sic protenderetur, nunquam in transuersum videretur, sed

sed semper in directum oculis opposita foret. Imò sic nunquam esset visibilis : quia tali modo ipsum corpus Cometæ semper deberet esse in rectâ lineâ interiectum inter visum nostrum & suam caudam. Proindeque sua opacitate semper deberet caudâ suam nobis occultare ac eclypfare ; taliter, quod nunquam nisi crines aliqui circum Cometam sparsi ac extra orbitam eius eminentes , & nunquam vllus caudatus, sed semper omnes criniti Cometæ deberent apparere. Hoc ita non est; ergo. Sed obijciat forte aliquis huic responsioni nō nulla argumenta. Primo, quia si cauda Cometæ esset lumen Solis transmissum; videtur quod & aliæ omnes , aut plurimæ stellæ talem caudam habere deberent. Secundo, quia sic videtur, quod cauda Cometæ deberet esse acuta , & abire in conum : nam cum sol absque dubio sit maior Cometâ, necessario eius radij vltra Cometam deberent vniri, & non dispergi. Tertio, quia sic sequeretur quod caudæ omnium Cometarum deberent esse eiusdem figuræ ; at ita non est, quia alij Cometæ sunt criniti ; alij barbati ; alij instar gladij ; alij instar cornu, quorum plures differentias ponit Plinius lib. ii. cap. 25. Quarto, quia ita sequeretur, quod

quod aliquando tota Cometæ cauda posset exclipfari; nimirum, quādo terra inter Solem & Cometam interposita eſſet: at hoc nunquam factum eſt; ergo.

Sed respondeo, Ad primum; hoc non ſequi: diuerſitas autem ex eo neceſſario eſſe debet; quod Cometæ habeant alium modum ſubſtantiæ, quā alia ſtellæ; & mediā diſpoſitionem inter raritatem, & denſitatem; ſic vt & lumē Solis recipere, & etiam tranſmittere poſſint; quod alijs ſtellis propter maiorem denſitatem non contingit.

Ad ſecundum dico, hoc neceſſario contingere debere propter aliquam radiorū Solis in ipſo Cometā refractionem, quā fieri poteſt, vt radij Solis in ipſo corpore Cometæ vniantur, & in tranſitū per ipſum iterum dilatentur, ac diſpergantur: ſicut in multis conuexis vitris, & lumen Solis, & ſpecies viſibiles primum vniri, & poſtea diſpergi, diſgregarique videmus.

Ad tertium respondeo, differentiās illas Cometarum, quas Plinius ponit non eſſe differentiās veras Cometarum, ſed ignotorum meteororum; quæ male Cometis adſcribuntur. Etenim Ariſtoteles 1. Meteor. cap. 7. duas ſolum Cometarū ſpecies facit;

D

crinium,

crinitum, & caudatum : reliquorū non meminit. De crinitis quia rari sunt, non multū dicere possumus:credo equidem nullos reperiri. Sed qui criniti Cometæ ab hominibus appellantur, vel ad *ιμφάσεις* vel ad ignes elementares esse referendos. Sic quia hisce diebus nubilo existente aere circa Veneris stellam corona, seu Halo apparuit, vulgo sparsum fuit, præter caudatum, etiam crinitum alium Cometam apparere: quod si criniti vlli Cometæ reperiatur, verisimile est tum solum eos fieri, quādo Sol directè Cometæ est oppositus. Tum enim cauda eius in altum spargitur & necessario caput Cometæ in medio suæ caudæ apparet: ex quo crinitus videri debet. Tum enim cauda breuissima debet apparere, ex eo, quod non in transuersum sed in longum oculis nostris obijciatur. Sic baculus vel hasta si transuersim ante oculos ponatur, longa; si in directum, breuissima, & omnis longitudinis expers, ac instar rotundi corporis apparet.

Ad quartum, respondeo, ideò hoc non fieri, quod Cometa altior sit, quàm vt vmbra terræ ad eum pertingere possit. Potest etiā ex aliā causā id nunquam factū esse; quod scilicet nunquam contigerit Solē ita ex diametro Cometæ opponi. Equidem si
Cometæ

Cometæ per Zodiacum decurrerent, frequenter talis diametralis oppositio accidere posset: at cum nunc huc, nunc illuc extra Zodiacum decurrât, non est mirum, talem directam oppositionem, atque Eclipsim nunquam accidisse.

Ad quintum respondeo; verum esse; & hæc, & similia nos rapere in admirationem naturæ Cometarum; sed minime probare eos de naturâ coeli non esse. Iam ante in responsione ad 1. & 2. diximus modum & rationem, qua fieri forte potest, ut cū Cometa maximus nobis apparet, magnū spaciū cōficere videatur, cū decrescit, paulatim minus.

Ad sextum dico; neque per Cometas etiam posse videri, sed solum per caudā eius, quæ non est pars Cometæ, sed splendor luminis. Possibile autem est lumen magnum per radios minoris luminis videri.

Ad septimum, quodcumq; dicatur; nihil inde contra nostrā opinionem infertur. Si sint eiusdē speciei, possunt diuersos motus habere. Venus enim, Mars, Saturnus, cum non sint diuersæ speciei, diuersos tamē motus habent. Homines omnes sunt eiusdem speciei; & tamen vnus potest abire ad dextrā, alter ad sinistrā. Sufficit quod cōueniant in genere motus; & omnes motu circulari.

qui cœlestium corporum proprius est, moueantur.

Ad octauum, concedo Maiorem; sed nego Minorem. Etenim cœlum esse liquidū, & pertransibile vel Soli hi tam diuersi Cometarum motus, quos tam varijs argumentis, atque efficacibus, cœlestes esse, ac per cœlum vehi probatum est, euidentissime ostendunt; præter varias alias rationes efficacissimas, quas hic in medium afferre longum foret; eo quod ipsæ non breuiorem, quam sit hæc de Cometarum naturâ, tractationem requirerent. Ad probationem Minoris ex sacris literis desumptam, & primò ad locum Iob. Respondeo: non certò posse dici, quid ibi per verbum (solidissimi) intelligatur; & quæ sit proprietas vocabuli Hebraici, quod in verbum (solidissimi) est translatum. Possunt enim cœli dici esse solidi, non quod sint duri & imperuij, sed quod sint corporei; constantes trinâ dimensione, sicut alia corpora, & sicut quæuis corpora tangibilia, imò sicut æs ipsum, quod maxime est crassum & corpulentum; quodque non sint spacia imaginaria, omni corpore vacua. Vel potest dici quod dicantur solidi; quod etsi liquidi sint, stent tamē in loco firmiter librati, solo nutu, & impetio

rio Dei: vel potest etiam dici, quod ibi nomine coelorum veniat intelligendum solum firmamentum, quod quia stellas fixas firmiter continet, firmamentum ac solidum potest vel appellari, vel reuera est. Sic Homerus quoque *Iliados* 5. & *Odyssææ* 11. *οὐρανὸν πολυχάλκον*, & alibi, *τιθεῖσιν*, hoc est coelū creum, & ferreum appellavit; non quia durum, sed quia splendens instar æris, aut ferri. Porro quod non sit necessario tenendum, esse solidum, ex alijs tum sacrae scripturae, tum Sanctorum Patrum locis, & auctoritatibus colligi potest. *Esaïæ* 4. versiculo 22. habetur: *Qui extendit cælum, sicut teæne quid.* & versu 6. habetur, *quod cæli, sicut fumus, liqueſcent,* vbi videtur cælum rei tenui & fluxili comparari. Accedit, quod ex sacris literis videtur asserendum motum non competere ipsis orbibus, sed sideribus. Scriptura enim ubique motum adscribit stellis, & non orbibus. Sic 1. *Ecclesiastici* vers. 5. habetur: *Oritur Sol, & occidit, iterumque ad locum suum reuertitur.* & cap. 10. *Iosue* vers. 5. habetur, *quod Sol & Luna steterint.* & *Abacuc* cap. 3. vers. 11. dicitur *Deus educere remotiora sidera,* quodque tempore suo *Arcturum* cum filijs eius. & cap. 38. *Iob* vers. 3. & *Esaïæ* cap. 10. vers. 13. & passim varijs locis apparet,

quod sacra scriptura apertis verbis, motum
nō coelis, aut orbibus, sed ipsis astris adscri-
bat. Si ipsa astra mouentur & nō orbes; er-
go cœlum liquidum esse necessario conse-
quitur. Id porro non pauci Sancti Patres
clarè docent, Iustinus Martyr respōdens ad
90. quæstionem Orthodoxorum, dicit stel-
las non esse affixas cœlo, sed proprijs moti-
bus moueri. Origenes li. 5. contra Celsū,
& lib. 1. *περί ἀστρον*, ca. 7. ait sidera proprijs mo-
tibus agi; nec esse partes cœli, nec secus in
cœlo esse, quam sunt in terris animantia,
pisces in aqua, volucres in aere. Idem pro-
diderunt Eusebius Emisēnus, & Diodorus
Tharsensis in exponendo locū Genes. ca. 1.
vers. 16. & 17. Et Chrysostomus id clarè di-
cit homiliā 6. & 13. in Genesim his verbis:
*Absit, inquit, ut cogitemus Deum affixisse cœ-
lo astra. Cernimus namque ea moueri, & de vno
loco in alium transire.* In homilia ad Populum
Antiochenum idem confirmauit, nempe,
*cœlum esse fixum & immobile; Solem autem cum
ceteris astris in ipso quotidie circumferri.* Phila-
strius Brixienſis in Catalogo Hærescon as-
serit, dicere cœlum per se moueri, & eius
motu vnà cieri astra, hæreticū esse, & alie-
num à fide Catholicā, eiusque assertores
paginae vanitatis magis, quam Christianæ
doctrinæ

doctrinæ consortium habere. Et D. Augustinus II. de Genesi ad literam dicit; cœlos stare, astra moueri, etiam teneri posse.

Porro, & D. Basilius naturam cœlorum dixit esse *λεπτὴν ὡς αἶπρος*, id est, *tenuem sicuti fumum*. Rupertus I. de trinitate cap. 22. dixit, *firmamentum non solidum quid, aut durum, ut vulgo putatur, sed aerem esse extensum*. Ad secundam minoris probationem, quâ dicitur, quod inde sequeretur, quod sic non esset nisi vnum cœlum continuum vsque ad spacia inania, quod sacris literis repugnat: Respondeo, hoc inde non sequi, sed solum quod vsque ad firmamentum, seu vsque ad locum stellarum fixarum non sit nisi vnicū continuum cœlum idque liquidū, per quod Planatæ decurrunt. Quod teneo verū esse. Firmamentum verò credibile est esse solidum, ex eo quod per ipsum nullus motus fieri debeat, cum sit sedes stellarum fixarū; & aliquam videatur requirere soliditatem, ad tam infinitas fixas stellas cōtinendas, & figendas. Quod cœli in sacris literis frequentissime in plurali numero appellantur, nihil est: quia dicit Chrysost. hom. II. in Genesim, id solum esse ex eo quod nomen Hebraicū, quo cœlum appellatur, ex proprietate illius linguæ sit solum pluralis, non singularis

numeri; vnde in Latinam linguam transfertur nomine cœlorum in plurali numero. Præterquam quod eo seposito adhuc plures cœli essent, etiamsi totum spacium Planetarum liquidum & continuum quid esse assereretur.

Porro quod 2. Corinth. 12. D. Paulus in tertium cœlum dicatur raptus, non probat multitudinem cœlorum. Locus enim ille sic est intelligendus; quod pro primo cœlo, quoque capiatur regio elementaris, quæ in sacrâ scripturâ, sæpe nomine cœli appellatur, vt cum dicitur, *Nubes cœli*, *Volucres cœli*, &c. pro secundo cœlo, cœlum astri-ferum, seu spacium illud totum in quo sunt astra: pro tertio verò cœlo Empyreum, in quod putandum est D. Paulum raptū fuisse. Nisi forte verba illa sensu mystico sint intelligenda; quod scire excedit orbitam scientiæ meæ, tum Medicinæ, tum Philosophiæ.

Porro declaratâ Cometæ essentiâ, restat vt quid præfagiat examinemus. Communis hominum opinio est, Cometam multa mala, ventos, tēpestates, terræ-motus, aeris æstum, siccitatem, annonæ caritatem, pestes, bella, mortes Regum ac Principum, regnorum religionisque mutationes præfagire.

sagire. Aristoteles 1. Meteororum c. 7. dicit
Cometas præfagire ventos, & aeris siccita-
tem, eò quod generentur ex siccis exhala-
tionibus, quæ pertranseundo aerem in quo
sunt, necessario debent ei suas qualitates
communicare. Ptolemæus II. quadripartiti
sic inquit: *Observanda sunt crinita stella, siue
illa Eclipsium tempore, siue quandocumque con-
specta fuerint: quorum natura est ea facere; quæ
Martis, & Mercurij propria sunt, bella, æstus, tur-
bulentias, quæque hac ipsa comitantur.* Plinius
lib. II. cap. 25. vocat Cometam *sidus magna
ex parte terrificum, ac sævum.* Sancti Patres,
Damascenus, Eusebius, ac multi alij de Co-
metâ loquuntur, vt de signo significante
iram Dei, & minante hominibus plura ma-
la in correctionem peccatorum ipsorum.
Poetæ vbique vt dirum sidus, & tristitia omi-
na portendens decantant. Lib. 3. Oraculo-
rum Sibyllinorum sic habetur:

*Sole sub occiduo verò vocitata Cometa,
Stella relucebit gladij mortalibus index,
Et famis, & mortis, præclarorumque virorum
Atque Ducum interitus, magnorum, Nobi-
liumque.*

Virgilius I. Georgicorû loquens de bellis
quæ post Cæsarem interfectum fuerint,
sic ait:

*Non alias cælo ceciderunt plura sereno
Fulgura, nec diri toties arsere Cometa.*

Et Lucanus libro I.

*Ignota obscura viderunt sidera noctes
Ardentemq; Polum flammis, cælogq; volantes
Obliquas per inane faces, crinemque timendi
Sideris, & terris mutantem regna Cometem.*

Et Claudianus ait:

Nunquam cælo spectatum impune Cometam.
Manilius libro II. Astronomicæ, cap 9. siue
in fine, sic enumerat effectus Cometa-
rum:

*Nunquam futilibus excanduit ignibus æther;
Squallidaq; elusi deplorant arua Coloni;
Et steriles inter sulcos defessus Arator
Ad iuga mærentes cogit frustrata iuuenços.
Nunc grauibus morbis, & lenta corpora tæbe
Corripit exustis lethalis flamma medullis,
Labentesque rapit populos, totasq; per vrbes
Publica succensis peraguntur fata sepulchris.*

Et deinde:

*Quin & bella canūt ignes, subitoscq; tumultus,
Et clandestinis surgentia fraudibus arma.*

Et paulo post:

*Ciuiles etiam motus, cognataque bella
Significant.*

Præterea historiæ plenæ sunt tristibus
euentibus, maximis cladibus, quæ Cometa-
rum

rum apparitionibus successerunt; adeo ut fere nullus videatur mundo illuxisse Cometa, quin aliquid magni semper sit insecutum. Quin & sacra scriptura varijs locis videtur indicare, eiusmodi coeli signa semper Dei iram, & futuram humani generis castigationē indicare; ut II. Ioelis, & Matth. 24. ubi habetur diem iudicij iudicatum iri eiusmodi, in coelo, ac stellis, portētis prægressis.

His tamen omnibus non obstantibus, opinio mea est, Cometas nihil præfagire naturaliter, seu virtute naturali. An aliquid præfagiant supernaturaliter, & ex instituto Dei, non est meæ Professionis disputare; sed id relinquo Theologis disputandum, & auctoritate Sanctorum Patrum; quam tamen in hac materia magni etiam puto esse momenti, confirmandam.

Quod autē nihil indicent virtute naturali, probo. Primò. Si Cometæ eiusmodi futura mala indicarent, vel indicarēt ea ut causæ eorum, vel ut coeffectus: nam ut effectus nō possunt indicare. Quia quod indicat in ratione effectus, indicat suā causā; & indicat præsens vel præteritū. Cometa nō indicat mala ut suā causā; quia mala subsequētia nō sunt causa Cometarū: sed potius Cometę deberēt esse ipsorū malorū causæ. Et Cometæ
non

non indicant præsens, vel præteritum, sed futurum. Præter has signi rationes ferè nullæ sunt aliæ, quia nihil fere est signum alterius Physicè, nisi vel vt effectus eius, vel vt coeffectus, vel causa. Dico ferè; quia adhuc sunt aliæ rationes signorum: sic pars visa est signum sui totius ibidè præsentis, &c. Sed similes rationes signorum non competunt Cometis. Atqui Cometa neque signum est futurorum vt causa; neque vt coeffectus; ergo non est signum eorum. Non vt causa; quia Cometa non est causa futurorum euentuum. Non vt coeffectus; quia quod significat, vel indicat vt coeffectus; illud indicat alium effectum procedentem ab eadem causâ, à quâ ipsum proficitur. Sic gracillatio gallinæ est signum oui ponendi, quia gracillatio & ouum, sunt duo effectus procedentes ab eadem gallinâ; quia gallina est causa vtriusque: & quando vnum effectum efficit; tum statim etiam efficit & alterum: & sic vnus effectus est signum alterius effectus, vel præsentis, vel statim secuturi. Sic magna claritas nocte in aliquo loco, est signum, quod in illo loco, vbi illa est, sit magnus calor; quia calor, & claritas sunt coeffectus, siue duo effectus eiusdem causæ, nempe ignis. At Co-
metæ

metæ & futuri tristes euentus non sunt effectus, ab vnâ, & eadem causâ procedētēs; ergo non possunt se mutuò indicare; vel vnum non potest indicare alterum in ratione coeffectus. Si ergo Cometa in nullâ ratione signi Physici indicat futura mala, id est neque vt causa, neque vt effectus, neq; vt coeffectus; ergo non indicat.

Quod Cometa non sit causa futurorum euentuum, probō: Quia, quicumque asserunt Cometam esse causam futurorum euentuum, nituntur eo fundamento, quod Cometa sit exhalatio fumida, pinguis, calida, sicca, sulphurea in aere accensa: & quatenus est talis exhalatio, catenus dicunt ipsum tales producere in aere, ac corporibus animalium dispositiones, ex quibus eiusmodi mala postea proueniant. Adeo vt tota vis præfagiendi Cometis adscripta nitatur eo fundamento, quod Cometa sit exhalatio accensa: at hæc doctrina est falsa, vt supra est probatum: ergo falsa est quoque omnis virtus præfagiendi, quæ Cometis ex eo capite adscribitur: existente enim fundamento falso, concidunt omnia, quæ ab illo fundamento sequuntur, & dependent.

Porro quod Cometæ, & futura mala etiam non sint coeffectus, probō: Quia non possunt

possunt in aliâ ratione Physicè esse coeffectus, quam quod Cometæ sint effectus exhalationum in genere causæ materialis: & futura mala sint effectus earum in genere causæ efficientis; adeoq; in diuerso genere causæ. At futura mala non sunt effectus talium exhalationum ex quibus fit Cometa: quia Cometa non fit ex talibus exhalationibus; sed est corpus cæleste, vt ostensum est: ergo futura mala & Cometæ non sunt coeffectus, seu effectus ab eadem causa procedentes. Porro qui de præfagiendi ratione Cometarum scribunt, dicunt Cometæ futura mala indicare hac ratione. Exhalatio illa, ex qua fit Cometa, inquit, est sicca: si sicca, ergo aerem, per quem trāsiuit, exsiccauit. Deniq; est incensa. Si est sicca, & incensa; ergo tam vasti corporis flāma aerem exca'efecit, & exsiccauit, & impressit ei calidā, & siccā intemperiem; & vapores aeris consumpsit, & exsiccauit. Si ita consumpsit & exsiccauit; ergo non fient pluuiæ: si non fient pluuiæ; ergo fiet sterilitas agrorum, & aer non depurabitur. Pluuiæ enim aerem multum depurant. Si fiat sterilitas agrorum, fiet annonæ caritas. Si annonæ caritas; ergo homines coacti necessitate comedent prauos cibos. Ex tali hominum diatā, sequentur varij morbi.

bi. Denique quia aer à flāma Cometæ erit excalefactus, & exsiccatus, grassabūtur febres ardentes, & morbi calidi: & quia illa exhalatio est fumida, viscida, sulphurea, ac prauæ naturæ, malignam quoq; aeri imprimet qualitatem, à quā simul cum annonæ caritate fient pestes, &c. Porro quia illa exhalatio fumida non potest in totū esse consumpta; sed multæ eius portiones in aere, per quem transierūt, & præcipuè in infernâ aeris regione, ad quā flamma Cometæ non pertingit, debuerunt esse relictæ, eatenus fient venti; quia ventus est exhalatio calida & sicca. Tales enim portiones exhalationū relictæ à media aeris regione frigidâ deorsum protrusæ, & ab oppositâ terrâ in latus agitatae facient ventū. Quatenus fient vēti; eatenus sequētur in mari tēpestates; à maris tēpestatibus, regionū inundationes. Cū eiusmodi exhalationes generātur, nō omnes in altū adscendūt; sed aliquæ etiā in visceribus, ac cauernis terræ relinquūtur: illæ autē exire nequeūtes, terræ-motus excitabunt. Vltcrius, quia corpora animalīū alterātur à qualitātib. aeris, & aer, vt iā dictū est, à Cometâ est excalefactus, & exsiccatus: necessariū est vt in corporib. hominū multiplicētur humores calidi, & sicci, & cōsequēter, multiplicetur

plicetur bilis: & quia bilis, facit homines iracundos; hinc homines fient iracundi, seditiosi: hinc in vrbibus ac populo seditiones. Et quia etiam Principes fiunt iracundi; fient bella: & quatenus fiunt bella, & Principum mortes, catenus sequentur regnorum, religionisque mutationes.

Ex quibus omnibus patet totam vim præfagiendi Cometarum, eo niti fundamento, quod Cometa sit exhalatio accensa in aere. Quod cum sit falsum, nemini non sit manifestum, omnem vim præfagiendi Cometarum, falsam quoque, friuolam, ac ridiculam esse. Accedit, quod licet verum esset, quod Cometa esset, talis exhalatio accensa; tamen nulla ratione posset præfagire pleraque eorum, quæ ei adscribuntur. Quod probatur, Etenim talis exhalatio, necessario accendi deberet, loco altissimo, multis millibus miliariorum à nobis distante, vti supra ostensum est, ex eo quod Cometæ motu primi mobilis rapiantur. At exhalationes tam remoto loco accensæ, quomodo possunt aerem hunc infernum afficere? Si exhalationes præter omnes adscenderint in suprema aeris loca; ergo aer infima sui parte est depuratus: ergo nullæ mæte exhalationes hinc amplius remanserunt, quæ

quæ corpora nostra male afficere possint. Et si exhalationes omnes ibi supra sint accensæ; ergo sunt exustæ: ergo non amplius sunt, nec ullam malignam qualitatem reseruârunt. Ignis enim omnem venenatam qualitatem deleuit, & extinxit; vt patet in peste, in qua ignes exstruuntur, vt venenata aeris qualitas extinguatur. Si dicatur, quod saltem aer est exsiccat, & excalesfactus; atque ex eo saltem multa mala cōtingere possint. Primum videtur quod non possit esse calesfactus; quia cum ignis ille fuerit tam multis millibus miliariorum à nobis remotus, non potest sic inferiorem aerem multum excalescescere, vel exsiccare. Et quomodo potest aer ab eo calefieri? Plerumque enim asserunt scriptores, Cometas fieri in Autumno: Autumnū sequitur hyems: quantum in Autumno aer à Cometâ esset excalesfactus, tantum videtur, quod iterum à subsequente hyeme deberet refrigerari. Et si aer excalesceret à Cometâ, & exsiccaretur, magis calidus esset, cum adhuc ignis, & Cometa durant, quam cum est extinctus: sed quis in aere à Cometâ sensit calorem, aut siccitatem? Non est dubium quin Cometæ frequenter apparuerint, quando aer fuit maxime frigidus.

Accedit, quod inter Cometam, & infimam hanc aeris regionem, intercedat media aeris regio frigidissima, quæ omnem Cometæ in. cam actiuitatem videtur necessario debere impedire.

Porro omnia quæ deducunt auctores communiter fieri à Cometâ, per quandam sequelam causarum, & effectuum sunt à suis causis tam remote, tam fortuito, & tam contingenter, vt nullam habeant fiendi vel necessitatem, vel apparentiam. Non enim sequitur; aer est exsiccatus ergo nulli fient vapores, & consequenter nullæ pluuiæ. Etenim æstate aer est exsiccatus, & tamen nihilominus paulo post in Autumno fiunt pluuiæ maximæ. Non sequitur, relictæ forte sunt aliquæ exhalationes in aere, quæ non sunt absumptæ; ergo fient magni venti: quia forte non sunt relictæ; sed fursum omnes adscenderunt. Et vt aliquæ relictæ sint; nō est necessarium quod inde sequantur magni venti.

Porro vt fiant magni venti, non sequuntur propterea necessario, aut frequenter, terrarum, aut regionum inundationes. Nec necessarium est, quod adscendētibus è terrâ exhalationibus, aliquæ in terris remanserint, quæ terræ-motus faciant.

Cur

Cur enim multæ remansissent, & non exiissent cum alijs ? & vt remansissent, non sequitur, quod illæ terræ-motus statim facere debeant. Fortuitum hoc nimis est, & rarum. Frequenter, & singulis annis in terrâ, & è terrâ excitantur exhalationes, & tamen nulli fiunt terræ-motus.

Dicunt, quia Principes habent corpora teneriora alijs, ideo præ alijs, ab infecto exhalationibus aere magis afficiuntur, & à morbis, qui tum grassantur, interimuntur. Ridiculum est. Quare enim Principum corpora sunt teneriora corporibus aliorum, aut magis prauis humoribus prædita ? Si Principes sint obnoxij Cometis propter corporis sui teneritudinem; ergo multo magis senes, mulieres, pueri: ergo illorum mors à Cometis esset prædicenda potius, quam Regum, aut Principum.

Dicunt, quia corpora fiunt biliosiora, ideo & ad iram prona: hinc subditi moliantur seditiones; Principes alijs vicinis Principibus bella inferunt. Longè petiti effectus, & longa series causarum. Aer non multum facit corpora biliosa, sed proprium temperamentum victus ratio, & c. Bilis aliquod aduentitium

incrementum non multum facit ad hominum iram. Ab alijs causis iracundia procedit; à biliosâ cōplexione naturali, non aduentitiâ, prauâ educatione, imprudentiâ, iniurijsq; perceptis. Nec ira Principū facit bella, sed cupiditas dominandi, amor vindictæ, &c. Bella pendent à Principum, & Consiliariorum, aliorumque Principum suadentium liberâ voluntate. Quæ autem à liberâ hominis pendent voluntate, non sunt obnoxia actionibus neque cœlorum, neque Cometarum, neque aeris, nisi valde fortuitò & valde remotè. Quorum fortuitorum, & remotorum euentum nulla potest fieri prædictio, nisi valde temeraria, fortuita, stulta atque incerta. Quis Aulicorum animaduertit Principem suum post apparitionem Cometarum solito iracundiorè? Si Cometa tali ratione excitaret iracundiâ in Principibus; eadē ratione, & in alijs hominibus præcipue tenerioribus, vt mulieribus, pueris excitare deberet: at quis vnquam paterfamilias animaduertit vel vxorem suam, vel proles post Cometarum apparitionem fuisse iracundiores, quam ante eam? Iulius Cæsar Scaliger exercitatione in Cardanum 79. ca. 11. allerit Cometas nihil præfagire, neque vt causas, neque

vt signa: Etenim, inquit, existimare à Cometa Regem interfici, ridicula dementia est; tanto minus certi Prouinciam. Audiamus tamen & nonnulla alia stulta præfagia. Magnus Mathematicus Ptolemaeus in centiloquio, pronunciato vltimo sic inquit: Cometa quorum intercapedo est undecim signorum à Sole, si apparuerint in cardinibus regni alicuius, Regē aut Principē, aut ex Principibus regni aliquem moriturum prænunciant. Sin in loco succedente, bene se habitura, qua Thesauri eius sunt; suum tamen administratorem mutaturum: qui si in loco declinante, morbos, ac repentinas mortes fore. At si ab occasu moueatur ad ortum; externum hostem regionem inuasurum, sin non moueatur, Prouincialem hostem futurum. Cardanus lib. 14. de varietate rerum cap. 70. sic inquit: Cometa Colos dictus, rubens ac splendidus, vel liuidus, vel niger. Hæ enim omnes pessima; argentea, & candicans nimis formidabilis. diuturnæ quæque, & magna, & plures contrarijs sunt deteriores. & quæ frequentant, & hyeme, quam æstate, & diurna, quorariore, eo maius exitum portendant. Et iuxta Saturnum, pestes, & prodictiones, & sterilitatem. Circa Iouem, legum mutationem, mortem Pontificum. Iuxta Martem, bella. Iuxta Solem, toti orbi magnam cladē. Iuxta Lunam, magnas inundationes, aliquando siccitates. Iuxta Venerem, Principum mortem & nobilium.

lium. Iuxta Mercurium, varia mala, & multa.
 Iuxta Lyræ, deliciosis, & nobilibus. Iuxta
 Coronam & in Tropici, *Æquinoctijs*que, Re-
 gum interitum. Iuxta serpentem, & in Scorpione
 pestē. Iuxta Trigonum, perniciem ingeniorum.
 In fixis signis, terra-motus. Iuxta caput Gorgo-
 nis, & armatas figuras, bella. Iuxta Andromedā,
 & Cassiopæam, seruitutes, & desolationes. Iuxta
 Etidānū, & Argo, tempestates, & inundationes.
 Cum deliquis horrendæ, & miserabiles. Mobiles
 valde, siccitates, & ventos pariunt. Fixa diutur-
 niora mala. Cuspis etiā ostendit locum huic malo
 obnoxium. Quid stultius his præfagijs exco-
 gitari potest? quid stultius me foret, si tem-
 pus terere vellēt tam stultis, & vanis pro-
 nunciatis refellendis, desumptis, ex stultā,
 vanā, & superstitiosā diuinatrice Astrolo-
 giā? Aliam præfagiendi rationē habet Plin.
 lib. 11. ca. 25. Referre arbiurantur in quas partes
 sese iaculetur, aut cuius stella vires accipiat,
 quasq; similitudines reddat, & quibus locis emi-
 cet. Tibiarum specie, Musica arti portendere. Ob-
 scanis autem moribus, in verēdis partibus signo-
 rum. Ingeniis, & eruditioni, si triquetram figurā,
 quadratamve paribus angulis ad aliquos peren-
 nium stellarum situs edat. Venena fundere, in ca-
 pite Septemtrionalis Austrinæve serpentis. Qui
 longe stultiora adhuc Cometarū præfagia
 in-

intelligere voluerit, consulat Haly c. 1. part. 8. de iudicijs astrorū. Item c. 32. & 41. par. 8. eiusdem libri. Item Albumasarem lib. 5. de coniunctionibus magnis & in fine Florum & Cardanum lib. 2. 3. & 7. aphorismorum. Porro Cometas nihil mali vel efficere, vel præfagire huic mundo posse, adhuc varijs alijs rationibus potest probari.

Probo ergo secundo. Cauda Cometæ nihil agit; quia solum est splendor luminis, vt dictū est. Ergo si est aliqua vis agendi in Cometâ, erit in capite eius: at Cometæ caput, est valde parū: tam paruum autē sidus, nullam potest magnā in hæc inferiora exercere actiuitatē. Nam si vna alia stella sola ex ijs quæ in cœlo sunt, nihil potest notabile efficere in hoc mundo inferiore: immò si omnes stellæ cœli simul sumptæ parum efficiant, exceptis Sole, & Lunâ, à quibus ferè omnis, quæ in hæc inferiora exercetur actio, procedere percipitur; quid operabitur tam paruum sidus, transiens, nullo loco consistens, & tam exiguo tempore durans?

Tertiò. Vt ita esset, quod Cometâ haberet aliquam in hæc inferiora actiuitatem; qualis ea foret, impossibile esset scire. Nam si scire non possumus, quid alia cœli stellæ operentur, vt ex falsitate, &

incertitudine Astrologiæ iudiciariæ est manifestum; quæ tamen semper, & à condito orbe steterunt, & quarum virtus, iam quatuor mille pæne annis potuit obseruari; quomodo poterimus cognoscere Cometarum vires, qui rarò apparent, statim præteruolant, & citò pereunt?

Quartò. Vires siderum modificantur diuersimodè propter concursum actiuitatis tot aliorum siderum, quæ suas mutuò vires frangunt, mutant vel intendunt; & hæc est causa, cur eorum virtus cognosci nequeat: eadem ratione nec Cometarum poterit: multò minus, ex eo quod Cometæ, moueantur, & singulis diebus cum nouis sideribus coniungantur, à quibus eorum virtus variatur, modificatur, determinatur, incognoscibilis euadit. Dices, experientià cognoscitur: sed illa cognitio nimis est incerta. Nam etsi multa mala & tristes euentus in mundo post Cometas euenerint; nō ideo euenerunt virtute Cometarum; sed vel etiamsi nullus Cometa apparuisset, eodem modo prouenissent. In hoc mundo tam inconstanti, & ex tam contrarijs constante partibus, nihil potest permanere perpetuum: semper noui euentus, hīc tristes, & hoc anno: alibi, & alio anno læti. Nunquam

quam tres, quatuor, quinque anni (ad quos etiam multi Cometarum efficientiam extendunt) labuntur, quin aliquâ parte mundi semper aliqua mirabilia, tristitiaque eueniât: hic bella, illic mortes Principum; alibi inundationes, terræ-motus, annonæ caritas, pestilentia, mortes Regum; etiam si nulli Cometæ appareant. Quam multos vidimus tristes euentus hisce annis, quibus tamen nullus Cometa illuxit? cui, si illuxisset, omnes absque dubio adscripti fuissent. Sicut autem multa tristitia eueniunt, ita & læta: & ideo si quis ex historijs cōferret omnia, quæ post apparitiones Cometarū in mundo contigerunt, absque dubio non minora læta, quam tristitia reperiret. Nunquam in aliquo loco post Cometam tristes euentus secuti sunt, quin in alijs mundi partibus, vel sæpe in eadem non pauciores læti euenirent, & si non commemorentur. Ad felicia minus aduertimus, quam ad tristia, & horrenda. Quando fuit, quod trium, quatuorve annorum spacio non Rex aliquis, magnus Dux, aut Princeps mortuus sit? obiit magnus Rex Philippus, obiit Imperator, Serenissima Hispaniarum Regina, proles eius, Galliæ Rex, Serenissimus Maximilianus; à quo Cometa? nullus apparuit. Certè si

apparuiſſet, miſer Cometa homicidiorum omnium reus fuiſſet. Multi è contra apparuerunt, poſt quos nihil notatu dignum accidiffe eſt animaduerſum. Iulius Cæſar exercitatione 79. capite II. iam ante citatis, ſic inquit; *Multi itaque ſunt à nobis viſi Cometa, quos nulla uſpiam totâ in Europâ, ſubſecuta eſt perniciēs mortalium. Et multi clariffimi viri ſuo fato functi ſunt, multi euerſi Principatus, peſſum data familia illuſtriſſima, ſine ullo Cometa indicio.*

Quintò. Si Cometa tantū mali præſagit; cui regioni præſagit? an regionibus à quibus videtur? Atqui 24. horarum ſpacio hic noſter totum mundū circūmeauit; & à toto fere mundo viſus fuit: an ergo toti mundo minatur? Virtus ſiderum eſt vniuerſalis, nec ad vllam peculiarem determinatur regionem; ſed quas partes illuſtrant, in eas omnes agunt, modo ſint receptiuæ actionis eorum; ergo erit & Cometarum. Vnde ſi tantum mali efficerent, & præſagirent, non vni tantum regioni, ſed toti mundo, & facere, & præſagire deberent; quod à nemine proditum eſt. An verò illis regionibus tantum minatur, ſupra quarum vertice fertur? nam in illas rectis radijs virtutem ſuam magis demittit. Sed hic Cometa delatus

latus fuit super verticibus mediæ partis mundi; & super verticibus omnium mundi regionū, quæ sunt cis Æquinoctialē. (Nam ab Æquinoctiali ad minimum eius ortū incepisse non est dubitandum :) proindeque super verticibus omnium fere præcipuarū mundi partiū. Præcipue enim omnes mūdi regiones sunt cis Æquinoctialem; Austrinā mundi partem fere mare occupat. An ergo omnibus minatur? Decurrit hic Cometa super vertice totius Asiæ, Europæ, Mexicanæ, & maioris partis Africæ. Et vt ceteriores, magis notas mundi partes nominē; super tota Arabia, Persia, Turcia, Barbaria, Maroco, China, Iaponia, Hispania, Francia, Italia, Germania, Polonia, Belgio, Tartaria, Catay, Moscouia, Russia, Norvvegia, Islandia, Groenlandia, noua Sembla, &c. Super Maroco, & Fessa decurrit die decimā quartā, & decimā quintā Decembris. Super Hispania, quando fuit circa sinistrum humerum Bootis; nempe decimā sextā circiter Decembris. Die decimā septimā super Italia: die vigesimā, super Francia, Turcia; Die vigesimā secundā super Germania, Belgio; Die 11. Ianuarij sequentis, super noua Sembla, Groenlandia, &c. Quibus ergo minatur? an ijs super quorum capite

capite diutius hæsit? an ijs super quorum capite, maius lumen, maioremque caudam habuit? Si his; timeant Indi, & quicumque inter Æquinoctialem, & Cancri Tropicum habitant. Si illis; timeant Russi, Moschi, Groenlandi, Tartari; nam super eorum vertice existens tardè processit, adeoque multo tempore hæsit. Simus nos saltem securi, ad quos neutra ratio magnopere spectat; cum medio modo habuerimus circa vtramque: sed nec illi timere debent; quia quibus magno lumine magnaque cauda incubuit, eos citò pertransiuit: super quibus diu hæsit, eos exiguitate luminis sui, corporisq; languore, & debilitate non multum afficere potuit. An vero minatur ijs, ad quos cauda eius tanquam virga dirigitur, vt Cardanus loco citato, & Plinius lib. 11. cap. 25. asseruerunt. Illud dici non potest: quia cauda dirigitur ad omnes mundi partes. Cauda enim eius semper est auersa Soli. In qua parte est Sol, in oppositam dirigitur cauda eius. Prout Sol vertitur, ita & cauda eius. Vnde cum Sol quotidie totum circummeet orbem, necessum est, vt quoque cauda cum ipso circumducatur, & sic 24. horarum spacio, ad omnia cœli puncta semel dirigatur.

Sextò.

Sextò. Quo tempore effectus illi sunt à Cometâ expectandi ? si in multos annos virtus eius extendatur, quod multi faciunt, non mirum si multi interea tristes euentus, in hoc instabili, & peruerso mundo contigerint; non virtute ipsius Cometæ sed ab alijs causis. Seneca libro 7. naturalium quæstionum capite vīgesimo octauo, tradit ad annum vim actiuitatis eius extendi.

Sed & ad annum, & magis ad tres, quatuor, quinque extendi, omnino à ratione alienum est. Nam quomodo aget, si perijt? videtur quod eius efficacia maxime deberet elucere interim quam durat. Nam postquam perijt, evanuit, vel excessit, effectus eius ab aliorum siderum continuâ, ac perseuerante actiuitate, à ventorum interim orientium diuersitate, ab anni temporum alternâ varietate, necessario destrui, & exstingui debuisse videtur.

Hæc sunt eruditissime D. PROFESSOR, quæ de proposita mihi à Te materiâ habui dicenda: quæ vt æqui bonique consulas, rogo: cogitans præproperè à me, spacio pauculorum dierum in magnis praxeos, ac quotidianæ Professionis occupationibus

78 T. FIENVS DE COMETA.

bus esse conscripta; quæ non sunt passæ,
me aliquid exactum, limatum, ingenioque
tuo dignum exarare. Vale Louanij, ex
Musæo nostro hac decimâ octauâ Ianuarij
M. DC. XIX.

LIBERTI

LIBERTI FROMONDI

COMETA

ANNI CIO. IDC. XIIX.

AD CLARISSIMUM VIRVM

THOMAM FIENVM

IN ACADEMIA

LOVANIENSI

ARCHIATRV M.



RESPONSIONEM quâ me dignatus nō legi, VIR CLARISSIME, sed spacio aliquot minorum deuorauit, vt non auidius cerebrum Iouis. Quî sapuerit rogas? quod doceam. Et Cometas nihil minari dicis? falsum est. Hic certè Aristoteli nostro, non minas solum, sed exitium tulit. Vt patrem nostrum iugulares te barba illa stimulauit: immò me vt arenam tibi & congressum persuaderem cum veterano isto Lanista, quem non putauit tam miserè ceruicem

uicem daturum. Ite Peripatetici, & imaginarium funus facite vestro Principi.

Cardanum rides, vbi Cometem *iuxta Coronam, & in Tropico, Æquinoctijsq; Regum interitum* ait *portendere?* verissimum est. Noster hic per æstiuum Tropicum, sub Coronam ad Colurum Æquinoctiorum penetravit, & hoc Philosophici Regis fatum fuit.

Petis tamen etiam sensum meum. Vtinam possem aliter: à te sum, & sentio. Itaq; condonet Aristoteles, malo manus, quàm iugulum dare, & desperatis partibus transfugio ad victorem.

Non pugnaciter tamen (ne nimis efferraris) aut mordicus se hîc habuit, vt non succumberet: cap. enim 8. lib. 1. Meteor. attentè mihi lectus, opinioni suæ quasi diffidens, negotium hoc Cometarum difficile in primis ait, & abditum; & in quo sit satis docere quid fieri possit, non quid fiat. Libentissimè id ab ipso audiui: quia Peripateticis suis videbatur fecisse gratiam seorsim aliquid à Magistro opinandi.

Ibidem etiam pro ratione, cur frequentior generatio Cometarū extra Tropicos, copiam exhalationum affert, quæ in supplementum viæ lacteæ abundantius extra
Tropicos,

Tropicos, vbi via longius latiusque patet, perpetuo affluunt: quâ etiam materiâ facilius ibi formantur Cometæ.

Viden' vt doctrinam suam Cometarum struxerit in alterâ Galaxiâ? Hęc tamen pridem à iuratissimis etiam Peripateticorum subruta est, & consensu translata in firmamentum. Cur non & nos Peripatetici perseverare, & Cometæ Planetis salté miscere possimus? Non existimo Cometæ suos præ Lacte dilexisse nostrum Stagyritâ: imò facilius illos, quam istud dimissurum è manibus.

Itaque veniē securus, & quoniam ita vis; & ridiculam meam lucernam aliquid tuo meridiei afferre iubes, parebo. Præsertim vbi similitum nos etiam non incuriosi, quatenus Professio nostra flagitat: & longius etiam quandoque, vbi rei blandimēto nos permittimus, & sinimus euocari. Non enim studium meum dissimulabo: Theologia plurimū temporis nobis iam implet; sed Philosophiæ & Astronomicis aliquid etiam damus: & Theologo non indignum existimo, à Deo lassam aciem molliter in sidera & caeleste eius solium quandoque deponere.

Scriptio autem nostra contra confusio-

F

nem

82 LIBERTVS FROMONDVS
nem capitata erit. Primo, quid propriis nu-
per oculis in cœlo viderim, absoluam: reli-
qua lemma præfixum indicabit.

C A P V T I.

*Apparitio & motus Cometa
anni 1618.*

COMeta noster, quantum sciuerim,
Clouanij in altitudine Poli 50. graduum
& totidem minorū, die 29 Nouemb. anni
1618. est primum visus: sed non à me. 27. ta-
men Nouemb. vidisse se dicunt vicini Hol-
landi, in maiori licet. eleuatione Poli. Et
potuerunt, homines aquatici, & quibus
—— *torrà cannabe fulto*

Cæna & nox est in transtro:

Nobis Mediterrancis arbores, ædificia,
montes, & maxime omnium somnus, cri-
piunt cœlum.

Die Nouemb. 30. bene mane calide ad
spectaculum euolauī: & inspexi per dioptri-
cum etiam tubum satis curiosè. Circumfe-
rentia capitis maximas stellas primæ ma-
gnitudinis, vt Lyram, Arcturum, Canem
facile æquiparabat. color planè dispar: non
argenteus & fulgurans, qualis in Cane,
sed

sed hebes ac dilutè rubescens. Erat autem in signo Scorpionis. Stellas circum, quia à se nec valde illustres, & nubeculæ insuper infuscarant, distinctè notare non valui.

Proportio tamen ad remotiora sidera, fere supra Australem Libræ Lancem mihi collocabat. Scis enim vt Libræ asterismus Scorpionem antiquis sedibus expulerit; & omnia signa firmamenti ad 30. fere grad. à priscis temporibus promouerint in Ortum.

Cauda, siue barba potius, (præibat enim, non sequebatur. & de genere eorum fuit, quos Aristoteles Pogonias, id est, Barbatos appellat) à capite statim aut mento, qua effundebatur, strictior, sed vberior, & densato crine; deinde paullatim se dispergebat. vt non male quidam Ludimagistrorum virgis comparauerit, quæ in manu adstrictæ diffundunt extremitates.

Longitudo barbæ non ad amussim recta, sed quasi semioualis. Media conuexitas directè Coronam, concauitas ad Meridiem spectabat. Vltimi pilorum mucrones consumeantur in cuspide dextræ alæ Virginis ad stellam illam quintæ magnit.

Sequentibus aliquot diebus perpetua nubes cœlum obscurauit.

Quintò tandem Decemb. cum metuerem ne morem Planetarum, vti quidam alij Cometæ, noster imitatus, Soli reciprocando in Ortum se admouisset, occidissetque Heliacè (vltimo enim die Nouembris aliquot horis Solem ortu suo præuerterat :) planè secus, & in media mea vota res recidit. Solem enim multis gradibus in Occasum fugerat: barbaque longè quàm antea directior, exhibat ad infimam itellam finistri cruris Bootis.

Dies Decemb. sextus antecedentes superauit. Tunc innubi & stellante cœlo, horâ 4. matutinâ vidi Cometæ caput infra infimam quartæ mag. in dextro crure Bootis. Intra adhuc Scorpionem, sed non procul ab egressu erat. Distabat verò ab illa in crure Bootis s. ferè grad. & quantum circiter Arcturus ab illa lucida tertiæ magnit. quæ tenet sinistrum genu Bootis. Inter quam etiam & Arcturum barba longissimè excurrebat, ad duas illas Boreales in crinibus Berenices, id est, 30. facillè Zodiaci gradus obtegebat.

Dies deinceps ad vndecimum Decemb. inutiles & nebulosi.

Vnde-

Vndecimo ergo Decemb. horâ quintâ manè, apparuit iam in Libra, & ascendisse vltra Tropicum Cancrî. Erat autem supra clunes Bootis: inter scilicet Arcturum & illam tertiâ mag. in coxendice, sub brachio dextro Bootis.

Linea tamè recta ab Arcturo in coxendicem, nō transfixisset Cometæ caput, sed reliquisset ad Orientis latûs. Aberat verò à coxendice Cometa, quantum conjicere valui, gradu vno & 30. fortasse scrupulis.

Barba molliter falcata, non vt antè versus Meridiem, sed Boream, erat; concauitatemque concauo caudæ Vrsæ Maioris obuerterat, vt redderent simul figuram proximam ouali. Nunquam alias proluxior. Inter enim caudam Vrsæ & informem illam secundæ magnit. infra, per Colurum Equinoctiorum, sub Meridionales Plaustrî rotas effundebatur ad sinistram Vrsæ genu, id est, ad 50. facillimè gradus. Vnde barbator longè hic noster insigni illo Cometa anni 1577. fuit: cuius caudam longissimam mensus Tycho Braheus 22. tantum graduum inuenit.

Die 12. Decemb. alta & concubia nocte miratus sum conspicuo toto plastro, de barba ne pilum comparere. Tandem post

medium primæ & Sole inferum Meridiani arcum elapso, deformari paullatim cœpit; loco eodē quo pridie & pari longitudine; vt plane matutina crepuscula solent, cū Sol radios quos præmiserat, magis magisque implet & intendit, quo propius ad Horizontem scanderit.

Quantulū Cometæ caput promouisset, nō acutē per nebularū tenebras videre fuit.

Decimo tertio die manē de barba parum vel nihil expilatum. Caput duabus illis quartæ magnit. in dorso Bootis se palam admouerat, distantia forte 30. scrupulorum paullominus.

Decimo quarto, manē circiter medium sextæ reliquerat duas illas dorfi Bootis ad Orientem interuallo quasi grad. & dimidiij, adscenderatque versus sinistrum brachium Bootis.

Dies infecutos intercurrētia nubila turbauerunt: nisi quod decimo sexto manē deprehensus eleuasse barbam, & spargere inter quatuor rotas plaustrī maioris.

Vicesimo tandē primo horā 3. matutinā, in cōfinio Libræ & Virginis clarissimē visus, infra cubitum Bootis duos circiter gradus; ita vt Benenack in cuspide caudæ Vrsæ Maioris, cubitus Bootis, & Cometa Meridiona-

dionalior, tenerent angulos triaguli, cuius breuissimū latus, à Cometa in cubitū, longissimū, à Cometa in Benenack exiret. Caput Cometæ non longe discolor sideribus, gratè flauescibat. magnitudo aliquantū defecta & senescēs. De barba etiā largiter accisum. Ea enim versūs secundā stellā caudæ Vrsæ Maioris resupinata, & hanc ab vltima diuidens, vix vsque ad superiorē è duabus prioribus plaustri rotam pertinebat.

Vicesima secunda, nihil.

Vicesima tertia circa mediū 12. transierat Benenack, & visus supra tres illas quæ manū sinistra Bootis stellant, duobus iterū circiter gradibus. barba conuexo secundam caudæ Vrsæ distringebat. Largiter senserat forficē. Die sequenti horā 6. manè spectaculum repetij. nonnihil, sed quod vix oculis sentires, crepserat. vnde satis certum videtur exiguam habuisse parallaxin. Color oris iam palam luridus, & velut expirantis; barbæ flagrantior, vt ignem forte diuinares.

Noctes iterū aliquot quasi ex destinato sidera condidit pertinax nubes. Donec 27. circiter mediū vndecimæ vespertinæ aspexi reliquias solum Cometæ & clarum fere funus. Caput, cauda minutum quiddam,

informe, & confusaneum erant; nec videntum nisi à bene oculatis.

28. Manè gelidissima & siderea nocte certius aliquid vidi. Supra ferè secundam caudæ Vrsæ erat, & pæne in eandem lineam rectam inciderat cum secunda illa, cum antepenultima caudæ Draconis, & cum inferiore tertiæ magnit. in pectore Vrsæ Minoris.

Ab illa hora ad vndecimū Ianuarij diem an. 1619. cœlum imperuium fuit.

Vndecimo vidisti, non ego VIR CLARIS SIM E. Sequenti die à te epistolâ excitatus, & locum, non facillè alias mihi inueniendum, edoctus, ad satietatem spectavi, purissimo cœlo & vniuersis sideribus illustri. Itaque 12. Ian. 1619. hora sexta vespertina apparuerunt reliquæ Cometæ, nō spectandæ nisi à perspicacissimis, 3 circiter grad. supra vltimam caudæ Draconis; & in eadem linea recta, cum vltima Draconis & illa quæ est in radice caudæ Vrsæ Minoris. Penetrauerat ergo Cometa circulum Arcticum, & Colurum Æquinoctiorum transierat.

Die 13. Ian. vesperi hora 11. iam linea recta ab vltima Draconis per Cometam in spaciū inter radicem caudæ Vrsæ Minoris,

ris,

ris, & sequentem in cauda medium exhibat. Die insequenti vix quod sentiret se promouerat.

Die 15. Ian. hora 9. vespertina triangulum cum vltima lucida caudæ Draconis, & cum altera obscuriore in cauda (ante tamen longè tres minutulas in cuspide caudæ) deformabat. Distabat verò ab vtraque paullo amplius 3. gradibus versus Polum.

In eadem verò linea dirigebatur cū duabus vltimis rotis maioris plaustrī, quæ producta præteribat infra polarem. Linea item recta intendi poterat ab inferiori rota è duabus prioribus plaustrī per vltimam lucidam caudæ Draconis, in Cometam. Vnde planissimè esse potuit CLARIS. DOMINE, vt die 18. quando postremum à te visus, rectā lineam inciderit inter Alrucabam siue polarem & Dubben. Ego verò à 15. Ian. nunquam amplius vidi : & vicesima, quando reddita serenitas, fideratissima nocte, nulum toto coeli fornice vestigium, nulla vola Cometæ.

Hæc vita nostri Cometæ, non ab similibus longè illi, qui tempore Franc. Vicomercati sub Vindemiatrice in dextra Virginis ala exortus, celeriter in Septentrionem erepsit, & implicuit se voluminibus Draconis.

Durauit autem noster à 27. Nouemb.an. 1618. quando primum in Hollandia cōspectus, ad 18. Ian. an. 1619 id est dies 52. Exire tamen indubie longius, quia paruitas adhuc spirantis aliquandiu fugere oculos nostros potuit. Defecit autē in fine Cancrī, quo ex Scorpione per Libram, Virginem, Leonē, in præcedentia signorum euaserat.

Motus ei in principio concitator, quem sensim remisit. Tale enim fere Cometarū ingeniū. In iuuenta quasi vegeti & festinantes; tardantur deinde & conflagrescūt. Noster 6. 7. 8. 9. 10. Decemb. cōfecit circiter 17. gradus, id est, singulis diebus tres gradus & 24 minuta. 11. & 12. iunctim quatuor grad. 13. putauī se ad 4. aut 5. gradus incitasse. sed errorem postea deprehendi, similē imaginationi Thaddæi, qui bidui spacio Cometā anni 1577. saltasse putauit 12. grad. in longitudine & 6. in latitud. Itaque 13. Decemb. noster nō longe, puto, excessit 2. grad. A 28. autem Decemb. ad 18. Ian. an. 1619. id est, 21. diebus confecit 20. circiter grad. id est, nō totum vnum singulo quoque die. Non tamen æqualiter per omnes dies spargendus graduum numerus est; dies priores quibus incitator fuit cumulandi, & aliquid detrahendū est posterioribus. Longitudo verò

ac latitudo eius colligenda est ex locis, vbi cum singulis diebus signauimus.

Tibi auté, VIR CLARISSIME, astro-
rum consulto narratiuncula hæc data sit:
alius frustra legat, qui sideralem scientiam
non attulerit.

Dispiciamus breuiter iam de causis Co-
metarum vniuersim ex nostro hoc, qui plu-
rimum profectò in hanc Physiologiæ par-
tem, si quis vnquam alius, contulit.

Sequentia autem capita consumam in
aliquot argumentorum tractatione. Et
primo, te secutus, contra aërios Cometas,
deinde pugnabo pro cœlestibus. Non om-
nia tua argumenta distincte, in manum re-
sumam; quia id longum, & sæpe dixisti
quicquid potest.

C A P V T II.

Argumentum I.

Ab eleuatione exhalationum.

ANaxagoræ in primis & Democriti
opinio de Cometis satis olim ab Ari-
stotele nostro explosa; vt neminem vix
vnum è posteris inuenerit qui replaude-
ret. Cometas coiri & formari volebant,
cum plures Planetæ iuncti radios cōmuni-
cassent:

castent: vt plures candelæ in fascem compositæ perdunt ex longinquo imaginem multitudinis, & mentiuntur facis vnitatem.

Vnde Ioannes Dullaert Gandauensis, Scriptor elapsi Sæculi non indoctus. *Sine dubio*, inquit i. Meteor. *quando sic congregantur duo aut tres Planeta, iudicaret aliquis esse Cometam; quia tunc apparet lumen oblongum & cōtinuum sicut cornu. & hæc fuit causa deceptionis horum Philosophorum. Et alias aliqui & ego una cum eis propter eandem causam credidimus apparere Cometam. diligenti tamen facta obseruatione comperimus nos fuisse deceptos. aliqui tamen ex nobis persistebant in suis opinionibus, eo quod secuta est statim postea mors* ILLVSTRISSIMI ac SERENISSIMI Comitum Flandriae Philippi (is pater fuit Imp. Caroli V.) *semper Augusti in suo regno Castella. Et etiam quia secuta sunt bella in Ducatibus suis Brabantia & Gelria.*

Sodales deinde suos Dullaert solidè refellit. Planetæ enim (nisi fortè retrogradi) non adiuuant in Occasum motum primi mobilis, sed reluctantur, nec deflectunt ab Ecliptica ultra 8. gradus. Noster Cometa & secundo primo mobili, & 65. facile grad. ab Ecliptica abiit. Et vt verbo eos absoluiam, vidi

vidi ego omnes Planetas diuersis Signiferi partibus dispersos, excepto Mercurio, qui Soli erat vicinus, viuente tamen & vigente alibi nostro Cometa. Opiniones aliorum, qui Cometas cū Democrito in siderca regione locant, sed colorem alium allinunt, quo se faciunt probabiliore, in finem differemus, quando etiam alicui ex ijs sectæ nos applicabimus. Itaque Aristoteles ante omnia inspiciendus.

Aristoteles spretis, vti solet, veteribus, Cometas fere inter primos cœlo detraxit, & acrio Elemento miscuit. Affirmat enim ex pingui & resinosa terræ exhalatione globum aliquem cogi posse & cōuolui in aere supra nubes, qui aut motu, aut vicino Elemento ignis, aut radijs solaribus inflammatus, faciat speciem noui fideris.

Hic Cometa propriè erit, si comā in orbem spargat; alias iubatum, caudatum, barbatus, cornutum fidus appellabitur: aut si quod aliud nomen materiæ figuratio postulat. Plurimas enim eorum differentias apud Plinium & alios inuenimus: licet Aristoteles comati; saltem & barbati meminerit. irroborauit iam tamen, vt omnes cuiuscunque fili, vocentur Cometæ.

Post

Post Aristotelem vniuersi fere, etiam Astronomiæ Præsides, in quibus ipse Ptolemæus, quasi inuentionis iam & veritatis securi abierunt: donec tandem sæculo nuper lapso occasio maximè Cassiopæanæ stellæ plerosque ad respectum veteris opinionis permouit. Quibus autem machinis petitur Aristoteles? Primò. Nō eleuantur à terra vapores, aut exhalationes cōspiciuæ tam alte, quā est Cometæ locus. Quin immò Io. Bodinus l. 2. Theatri tribus, vt summū, miliaribus à nobis summouet supremos terre halitus. dicitq; valde largiter & liberaliter omnes veteres Philosophos intra duo etiā millia restringisse. Possidoniū deinde apud Plin. li. 2. c. 23. quasi secum ad tria tantū millia spacium illud relaxantē, adducit: cum tamen Possidonius in vulgatis Plinij exemplarib. 40. stadia habeat, id est, tota 5. millia. Sed fortasse milliare suū Bodinus extenderit vltra mille passus. Vitiū tamē in Plinio, & pro 40. rescribendum 400. recte monet Petrus Nonnius. Possidonius ergo 400. stadijs, id est, 50. miliarib. summos vapores à terra rejicit: consentienter satis Vitteloni li. 10. Theor 60. qui 52. .i. 12. circiter cōmunibus Germanicis. Recentiores iā tamen quidā probabilius ad 15. millia Ger-

mani.

manica numerū ampliant. Nimis ergo longe abiuit Cardanus, cum distantia illam ad 772. milliaria produxit, id est, 193. Germanica. Itaque Bodinus iuratus vbique Aristotelis nostri hostis, licet nihil in toto ipso fortē iustius, quam ignitos istos Cometas incessat; imbecillo tamen telo id iam facit, & vana hypothesi eleuationis vaporum à terrā nimis curtæ.

Sed tamen 15. milliariibus Germanicis in coelum exeāt terræ & aquæ anhelitus. Cometæ adhuc altius orbē suum ducunt. Nobilem an. 1577. Cometā illi etiam qui Aristotele nostro imbuti infra Lunā depresso-
runt, vnus Andreas Nolthius à mundi centro 8. amplius terræ semidiametris, (terræ vero semidiameter veriori calculo habet circiter 860. milliaria Germanica) Bartholomæus Scultetus à terræ superficie 7188. milliariib. Germanicis, & passibus 1400. remouerunt. Georgius Buschius adhuc liberalior 24. semidiametros ei donat. Atqui, accurrunt alij, nihil in tantā altitudinē aqua vel terra sursū exhalat: ergo Cometa nō est terrestrium fumorum vertex ibi accensus. Hoc argumentū eludi, sed nō longe potest. Si nimirū dicā leuiiores terrę spiritus quandoq; profundius in coelū scandere; quā est com-

communis & frequentior eorum altitudo, quam è crepusculis mensuram perspectiui. Posse itaque vltra spacium ab ijs circumscriptum aliquando, et firmiter, exhalationem pinguem & viscosam conuoluen- do in Elementare sidus tornari. Optici enim earum duntaxat exhalationum eleuatione metiuntur, quæ raperè crepusculū possunt, & solari radio se colorant. Tales verò grauitatem, densitatem, opacitatem aliquantā habent, vt lumen sorbeant & reflectant ad speciem. vt etiam ea re non longe infra se pigram illam totam nubium molem relinquant. Spiritus verò alij subtiliores, & in eonfinium Elementi ignis subuecti, crepusculi radios non sentiunt, transmittuntque per suam raritatem irrefractos. Horum altitudinem nullis oculis videre possunt perspectiui; quia non possunt ipsos. Ex talibus autem excelsissimi illi Cometarum consistunt & densantur. Speciem hæc responsio habet, sed introspecte an sit similis sue fronti. Demus itaque spiritus ibi rariore, & longius fugere, quam sequi possit humana acies, & ex ijs confertim stipatis coiri etiā Cometem. Materia tamen ista indubie multitudine grauata & densitate cōpressa recipiet pondus, & recidet deorsum facile.

ad

ad nubium circumferentiam: & hinc cōtra
experientiam Elementaris Cometes nun-
quam longe apparebit vltra mediam aeris
regionem. Verumtamen vt cum ibi susti-
neas, dices ignem esse, qui leuior aere, etiā
illo qui rarissimus est in suprema regione.
Si Cometarum ignis purus & sincerus, ac
Elementari sub Luna similis esset, argumē-
tum vires haberet: quæ flaccescunt iam, vbi
ignem, qui terrestribus exhalationibus pa-
scitur, magnam densitatem, & multum sæ-
pe proni habere scimus. Deinde habeat
Cometa multum rari & spiritalis ignis, qui
sit leuior toto Elemento aeris: materia ta-
men quam depascitur nondum est ignis.
Ista saltem ergo pondere suo desidet, flam-
ma superiori licet sursum expirante. Si re-
ponat, tenuem & igneum spiritum omnes
materiæ poros & venas intendere, & susti-
nere libratam in summo aere. Respondebo
prunam v. g. viuentem & quæ omnibus fi-
bris ignem bibit, recidere sursum abiectā,
per aerem tamen apud terras longe den-
siorem. Et in materia etiam leuiori, quæ ve-
nis & meandris intricatum ignem conce-
perit, exemplum valebit. Deinde facilius
longe est summū Cometæ corticem à Sole
inflammari priusquam in viscera ignis pe-
netret.

netret. Quo euentu flamma Cometam extrinsecus allambens, casum eius sustentando non erit. Itaque ingentes Cometarum sphaeras & toti Belgio magnitudine pares coelo præcipitari videbimus. quod inuisum hactenus, quod inauditum, quod falsum. Nullum ergo in spiritali illo igne intra Cometæ venas spirante & luctante contra ruinam præsidium. Videamus an in Asylo hoc ignorantium, coelesti influentiâ, maius.

Qui asserunt erraticam aliquâ aut fixam à Cometa quandoque eriniri sic vt coma videatur adhærere fideri, libenter vtuntur beneficio hoc influentiæ coelestis, quæ Cometam veluti habena deuinctum gubernet, & sub eodem aliquandiu sidere retineat, ne huc illuc diffuat. Influentia vero ista est vis attrahens ipsius astri, qualis est in magnete ad ferrum. Itaque hæc eadem vis quæ Cometam circumducit, potest etiam sursum attollere & suspendere in illo inani supremi aeris. Speciosum id, sed fictum & fucatum plane gratis. Cum enim cuilibet astri spargi possint crines, quoduis etiam habebit vim attrahendi quemlibet Cometarum; cum omnes consent pari & vnius temperiei materia. sic enim magnes quod-

quodlibet ferrum sine delectu sollicitat & trahit.

Quid igitur accidet? Cometam statim vicinioreſ ſaltem omneſ ſtellæ ad ſe rapiunt, diripientque certatim in infinitaſ parteſ. Ptolemæuſ opem hic Saturni contra me forte implorabit, qui Cometarum materiam à Marte potiffimum & Mercurio elici putat; denſari vero frigore an alia influentia ſenſis Saturni, continerique ne diffluat. Sed nihil iuuat bonus ſenex. Tota cœli quandoque diametro à Cometa diſtat: & nuper in principio Geminorū erat, cum noſter Cometa in Scorpione. Tunc ergo influentia eiſ debilior eſſet, laſſata interuallo, laxiuſque materiam retineret; quod non experimur. immò Cometa noſter quo propiuſ Saturnum per Scorpionem retro & Libram admouebatur, eo magiſ materia carpebatur & deperibat. Deinde ſi à ſidere ſuſpenditur contra lapſum Cometeſ, cur non longiuſ & ad fornicem ipſum cœli Lunæ abripit, cum influentia fortiuſ & impreſſiuſ trahat è propinquo? ſed abjicio hoc telum, & alterum ſumo in manum.

CAPVT III.

Argumentum 2.

A natura ignis fluxa & dissolubili.

ARgumētum hoc validum est, vbi præsertim Cometa non solo motu diurno cum primo mobili in Occasum fluit, sed alio proprio in Ortum renititur, vel abit in Septentrionis aut meridiei latus. sic enim inter vtrumq; motum oritur rixa, quæ facile discordem à se nec bene cohærentem ignis materiã dissipabit, aut diducet. Hinc Cometæ statim dissolutio, aut, vt minimũ, mille materiæ vicissim-figurationes, & turbatio rotunditatis, quam perpetuo in capite, nisi iam plane expirantis, notamus. Responderi potest, variari quidem capitis formam de orbiculari in quadratam; triangularem, &c. sed à nobis ob distantiam non sentiri. sic enim quadràgularis turris è longinquo visa, rotunda apparet, & angulos suos celat. Sed hoc de nostro saltem Cometa falsum (si, vt volunt ipsi tam immanè interuallo sit infra Lunam) quem per dioptricam arundinè sæpe rotundi & circum-

cisi

cisi capitis aspexi : cum per eandem tamen Lunæ verrucas & asperitates facillime deprehendam.

Quid ergo hîc dicent ? Hoc forte, aut materiam adamantino pæne visco, vt sic dicam, cohærere, aut exhalationes nouas superuenire, quæ discidia hiantium rimarû farciant, vel nouum etiam aliquando à fundamentis Cometam restituant in locum dissipati. Sed, vt acutè tibi VIR CLARIS. notatum, parti inferiori & fundo Cometę immensa exhalationum viscosarû moles, imagine densæ nubis obtendi deberet, vnde alimentum & supplementum Cometa trahat; & patiatur etiam sæpe Eclipsin.

Reponent, ob raritatem à nobis nubem illam non aspici. Nugæ. quasi verò exhalatio vno alteròve pede infra Cometâ nunquam coeat & densetur, sed solum præcisè vbi attigerit & adhæserit Cometæ corpus.

Bene etiam, CLAR. DOMINE, miraris, cur non latius Cometę incendium, & in totam circumquaque materiam semel & simul se spargat. cur non etiam in aere potius inferiori incendantur Cometarum ignes. Hic enim certè materia terrestri & idonea ignibus sæpe laborat. Pro quo etiam ecce se

mihi suggerit hoc argumentum. Exhalatio, quia corpus leue, volat à centro mūdi versus circumferentiam directā linea quantū potest: ergo omnia puncta & atomi exhalationis à se distantia æquali longitudine à centro, diuersa linea cœlum petent, & paulatim magis magisque se laxabūt & dispergent. sic enim duæ circuli lineæ à continuis etiam & proximè se adhærentibus circa centrum punctis eductæ, latius in diuersum abeunt, quo propius admoventur circumferentiæ. Itaque exhalatio etiam quo altius scandet, eo sensim magis relaxari necesse erit, & dissolui in maiorem raritatem. Igitur in infima regione densius ascendunt exhalationes, & coeunt facilius tenaciusque. In suprema rariores sunt, & calore insuper regionis magis exustæ. In inferiori quoque & pigro aere, vbi præsertim quies à ventis, nihil est quod cœtum & confluxum prohibeat: vbi contra supra nubes æther in orbem & cœli sequelam incitatus, exhalationem inconciliat & spargit. & quod etiam aliquid huc refert, exhalatio, nisi forte mole quandoque tardatam, præcedens non expectat subsequenti, vt possint iungi; velut in rota radius prior posteriorem.

Expe-

Expectabimus ergo posthac non supra nubium stationem, sed capiti nostro imminentes Cometarum formas.

CAPVT IV.

Argumentum 3.

A scintillatione.

Scintillaret etiam, inquis, Cometes, si esset ignea hypostasis. verissimè. Sic scintillantes videmus ignes fatuos, & vniuersos fere alios omnes. iactat enim se libenter flâma, res mobilis & inquieta. Videtur etiam aliquando vibrari & excurrere, quia pabulum sequitur, & vicina quæque allambit idonea igni.

Scintillationem Cometæ vertigo supremi aeris ipsum & nubes interlabentis adiuuaret, & omnes illi exhalationū fumi quos circumuectat & ducit in orbem. In genere ergo Planetarum Cometam ponemus; quia simili, id est, quieta & tranquilla luce. Stellæ vero fixæ, tanquā cœlestes quidam ignes, scintillant & vibrantur. vt hoc argumento scintillationis, præter cetera validissima sidus Cassiopæanū an. 1572. & nuperum Sagittarij an. 1664. affixerint firmamento

doctissimi Astronomorum. Acerrimam enim lucem vibrabant: vt etiam cum flagrantissimo omnium Cane conderent:

Negotium verò hoc totum scintillationis siderum difficile est, GLAR. DOMINE, si quid in tota Physiologia, & perplexum. Non Aristoteles, nò Vitello, non Alhazen, nullus ex ingeniosa perspectiuorum cohorte hactenus extricauit. mille tentauì vias, nulla satis ad votum. Tycho Braheus, & nuperior Franc. Aguilonius veterum quorundam opinionem reuocare conati sunt. Fixas videlicet in rotundo aliquo firmamenti acetabulo & lacuna perpetuo circū sua cētra gyrari: & inde crispum illud lumen torquere. Addit verò Aguilonius maculosas forte & lucis inæqualitate asperfas fixarum superficies: vt rapidissimè circa cētra sua vertiginando, nunc acrem & plenæ lucis faciem, nunc plagosam & fractæ nobis obuertant: & inde interruptio illa luminis, & species iactationis.

Planeta verò nullus se sic circa suū centrum rotat: vt de maculā patēre potest, quā Luna eandem semper ostentat. Scis tamen, quam hoc sententiæ non faueat, qui gyrum talem Soli suum centrum adseris; ex illa scilicet eius macula quam circumfert, & vide-

videmus migrare locum. Alij paruula quædam astra, & quantula forte quaterna illa Galilæi Medicea circa Iouem, volunt circumuolui Solem, & sublabendo maculare mobili & palante Eclipsi. Tu natiua macula & adhærente luidum Solem mauis, & cum astro subiecto eam circumagi. Ego, si causa illa micationis fixarum non displiceret, in Mercurio, Venere Marte, qui sæpe etiam crispicant suos crines, parem circum sua centra vertiginem lubens admitterem. certè decretio illa & accretio Veneris, nec Lunari plane ritu, non eam circa Solem tantum, sed circa proprium etiam centrum volui satis instant, partesque perpetuo alias aliasque Soli obuerrere, quæ nō omnes ad æque rapiant eius radium. Si enim id non sit, nescio quo modo Galilæus Venerem in maxima à Sole digressionem semicircularem viderit, cum alias plenam debuisset. sic enim Luna impletur, cum longissime à Sole discessit. Iupiter apparet tranquillior. etiam aliquoties vidi Venerem vespertinam in Piscibus nictantem, Ioue iuxta eam satis constante & quieto. Saturnus verò placidissimus est, rigidæ plane & immotæ lucis: vt singulis iam noctibus contemplari licet. ex comparatione scintillantis oculi

Tauri, à quo non longe abest in Geminis. Saturnus ergo non videtur gyrari circa suum centrum; si motus iste lucem diuariat, & speciem facit coruscæ nictationis. & aliud etiam argumentum habeo immobilitatis Saturni: discretio illa trium in ipso orbiculorum (de quibus in *Peregrinatione* nostra diximus) quos nunquam mutat & peruertit.

Itaque si audendum est, extremis Planetarum, Lunæ & Saturno, adimam volumen circa centrum: & quietem hanc causam habebo placidæ illius & fixæ lucis. Ceteri vero in medio Planetæ commune hoc habent cum fixis, perpetua vertigine circa sua centra rapi. & inde aliquando radium crispant & speciem præbent scintillantis. Minus tamen id faciunt quam fixæ, quia hæ forte rapidius circa sua centra citantur, & pluribus in orbem superficiei locis sunt inæqualis & plagosæ lucis.

Tentaui sæpe an hæc prima fronte ita blandiens opinio experientiæ & cœlo responderet: & vidi difficulter posse. Inter omnia nil me sic alienauit, quam videre multis noctibus omnes fixas, vt Arcturum, Lyram, Canem, Spicam, oculum Tauri acerrime scintillantes circa Horizontem, immò
toto

roto fere arcu ascensionis vsque ad Meridianū. cum vero huc, aut circa pertigerint, crinem incipere componere, & molli solū nec frequenti nictu vibrare. Video tamen alias an ratio aliqua optica hic non delite-
 scat. Verumtamen siue hac ratione, siue alia quacumque fiat illa micatio & siderum la-
 sciuiā, videmur hoc nacti, Cometam nō de genere firmamento affixarum, aut ignem fuisse, quia non lubricæ & petulantis lucis, sed tranquillæ & æmulæ quasi Planeta-
 rum.

CAPVT V.

Argumentum 4.

Motu.

MOtum etiam nostri Cometæ aduer-
 tisti, non pro igne fursum sed circu-
 larem & coelestē plane. Itaque non solo ra-
 ptu primi mobilis ab ortu in occasum tra-
 ctus & vexatus fuit. alias enim retro versus
 Orientē singulis diebus relictus apparuis-
 set. Iam vero omnia sidera fixa versus Oc-
 casum præuertebat; adiutus scilicet mo-
 tu proprio à Meridie in Septentriones.

Hoc

Hoc motu Eclipticam & Æquinoctialem tranſiit in Scorpione. & inde ſub Serpente & Coronam, per clunes, lumbos, brachium, ſiniſtram manum Bootis, ſupra Vrfam Maiorem, per Colurum Æquinoctiorū, in circulum Arcticum ſatis alte ſe penetrauit, & ibi euauit non procul à Polo. Si verò tota hæc via mente relegatur, inueniemus quadrantem amplius circuli maioris in Sphæra, & medium ſemper totius Sphærae cœleſtis noſtrum Cometam tenuiſſe. Similem motum habuit famoſus ille Cometa anni 1577. de quo ſcripſit magiſter quondam tuus, vir ab eruditione immortalis D. Cornelius Gemma. Viſus enim primo fuerat ſupra caput ſagittarij 13. Nouemb. anni 1577. (licet quidam viſum affirmarent die 10.) & inde per manum ſiniſtræ Antinoi, & nares Equulei, in dextrum Pegæſi armum ereptauit, ibique iuxta ſtellam Scheat conſenuit.

Cuius ſemitæ etiam filum qui diligenter ſequetur, ſegmentum circuli in Sphæra Maioris, & cœlum in duas partes æquales diuidentis inueniet. In hoc tamen diſparitas fuit. quod ille ann 1577. ab Occidente in Orientem, more Planetarum, motum obliquabat; noſter vero contra, ab Oriente in

in Occidentem. Qui etiam celerior & incitator fuit, quia diebus 52. quibus durauit, longius multo spacium confecit, quam alter diebus 74. Hic quoque anni 1577. Signiferi limites non transiijt: sed natus circa Tropicū Capricorni contabuit paullo citra Tropicum Cancrī.

Si vero, quod verissimum est, Cometes noster, vt plures alij, à segmento circuli maioris ne vel latum vnguē motu proprio exciderit: quis prudenter id existimet in pendulum aliquem, & instabilissimo aëris Elemento fluctuantem ignis nodū posse cadere? Incredibilis etiam est & nugatorius quorundam hīc sensus. Putant enim non eundem esse Cometam qui de hoc in consequentem locum migret; sed alium aliumque catenatim renasci, versus hanc aut illam cœli regionem materiā inuitante, priori Cometa continuo à tergo denscente.

Quasi verò singulis momentis noua materia velut ex compacto sub eodem circuli magni filo perpetuo disponatur, eadem etiā quantitate & forma, vt Cometa eam inflammet, seque in filio per omnia simillimo centies millies amplius regeneret. Cur etiam semper à parte Cometæ anteriori materia

materia præparatur? cur non retro? cur non ad latus? quæ causa veterem Cometam præcisè sic interficit, vt recte aboriat-
 tur & dispareat cum exoritur nouus? cur non 2. 3. 100. permanent & videntur si-
 mul?

Itaque Cometa noster supra totum ter-
 ræ quadrantem, vt Verè CLAR. VIR asseris,
 ab Indijs vltra Æquatorem, per immensa
 marium spacia, per Gallias, Belgium, Daniã,
 Nortuegiam, ad vltimam Thulen & gentes
 Polo subiectas, idem prorsus, & ipse non
 per intermedios vicarios peruenit. Hinc si
 per alia argumenta opinionem Aristotelis
 retinere liceret, equidem intelligentiæ ali-
 cui ex ijs quæ Elementaribus præsumunt, ne-
 cessario huic motui destinarem. sic enim
 omnia prona fuerint & facilia. Angelus æ-
 nim occulto fine, vel ad terrorem morta-
 lium & poenitentiam de peccatis, sub eodẽ
 arcu circuli maioris exhalationem agere
 potest, materiamque continere ne se spar-
 gat, aut aliam etiam è propinquo sufficere,
 si prior deflagrare cœperit. Quia verò su-
 bitaneus hic ignis est, & in significationem
 ac finem non longum assumptus, finit paul-
 latim & minutatim carpi dilabiq; Ange-
 lus; donec more naturæ alibi vsurpato,
 senio

senio quasi contabescat. Verumtamen quæsitum hoc & violens forte videatur, nec satis Physicum. & si intelligentiæ opera placet, probabilius profecto in cœlum Cometam euehemus, vt ibi in siderum æternorum cœtu à cœlesti intelligentia rotetur, solemniter nec tam miraculosè. Non enim bene quispiam exemplum noui sideris huc trahat, quod olim Magos duxit ad locum natalem Christi. Licet enim Cometam Origenes appelleret; vt etiam Poeta ille pius Mantuan.

Hac quoque nocte Magi clarū videre Cometem.

Tamen abiuit à lege ceterorum: qui primum Astrologis illis in Oriente conspectus, deinde subito Hierosolymis; vnde dux in Bethleem factus. Fuit autem is è materia forte sublunari, aut, vt puto verius, cœlesti, & quali stella anni 1572. cuius etiam instar fulgurabat & lasciuebat flammis. Fuit autem, vt videtur, humilior nubibus, cœlisque detractus, (quod fieri posse cap. 7. patebit) & ab Angelo, diuino nec ordinario iussu per aerem gubernatus. si namq; in nubibus aut supra cōstitisset, non facile notari potuit, an stabulū vbi puer iacebat, an quamlibet aliā è toto Bethleemitico oppido domū designaret.

Mirum

Mirum ergo non est, si ab Angelo specialiter circumlatus fuit, qui ad rem tantam factus erat; quique terræ plane propinquus, loco cum nostris Cometis non consentiebat. Adde quosdam SS. Patrum existimasse non stellam aut Cometem, sed Angelum imagine stellæ sapientibus illis apparuisse. quod forte tamen etiam eodem pæne redibit. Quid enim aliud potuerunt velle, quam sphericum aliquod è materia cœlesti an Elementari corpus ab Angelo deformatum, quod accensum radijs forte solari-
bus, tubiret & veluti animaret Angelus? nisi fortasse etiam, dum cogito, putarint intelligentias esse corporeas, & aliquam diuino imperio densasse aereum suum corpus, vt radios Solis plenius biberet reuibraretque instar fixi sideris & coruscantis. Quicquid tandem fuit; miraculum grande fuit; nec temere flectendum in præiudicium naturalis & cottidianæ Cometarum generationis.

CAPVT

CAPVT VI.

Argumentum s.

A barba.

Cometarum caudas, siue eæ barbæ, subtiliores exhalationum crines hactenus cum Aristotele putauimus : satis simpliciter. siquidem oculos iam satis aperio. Cur enim semper auersæ à Sole, si ita est? Certe exhalatio illa Cometam criniens aduersus Solem etiam quandoque erit. Cur enim non poterit? immò facilius id euenturū: quia latus Cometæ propinquius Sol intensius luminans, etiam rarefaciet, & disperget in crines. ac ita frequentius à parte Solis Cometa caudam aut barbam promitter.

Aliter tamen prorsus videmus: & doctiss. Petrus Appianus in quinque Cometis ab anno 1531. ad annum 1539. à se visis notauit, caudas semper à Sole auertisse: Solemque caput & caudam Cometæ in eodem círculo maximo disposita fuisse. Idem in octo Cometis eruditiss. Gemma Frisius obseruauit, & Cornelius filius in

H

Cometa

Cometa an. 1556. & sequentibus. Idem Fracastorius, Cardanus, Iul. Scaliger, & antiquior, Ioan. Regiomontanus. Deinde, si cauda subtilium exhalationum ignis quidam est : sursum potius rectâ lineâ nitetur, quo leuitas ducit; non vero exhibit per latus. sic enim subtilior flamma rogi directâ in cœlum exhalat.

Si dicant non patere flammæ exitum, nisi vbi materia spiraculum aperuit, vt videmus in fornacibus. Respondeo non habere id locum in materia Cometæ, spongiosa & ab igne rara, quæ qualibet se potest expirare. secundo spiraculū Cometæ non semper esset in latus. tertio non semper à Sole auersum. quarto extremitas caudæ semper iactaretur, & tandem sursum resurgeret.

Vidit hoc fortè doctiss. Regiomontanus, ideoque caudam sursum semper elatam demonstrare est adnixus; & iacentem apparere fallaciâ visionis. Sed fallitur profecto ipse, & ratione Optica abutitur: quod pluribus persequi longum, nec pro modo scriptiunculæ huius.

Aliter fortè dici potest. & caudam illam spargi immediatè sub concauo Elementi ignis, nec scandere altius; quia ignis alius leuior

leuior supra est, qui locum illum iure suo defendat. Sed hoc etiam vanum. Si enim Cometa per verticē se exonerat, & igneus illæ caudæ riuus à concavo Elementi ignis leuioris reflexus, in longum refundatur, faciliè notabitur ille fluxus, motuque & agitatione continuā sese prodet.

Secundò, Cometæ caput, vtpote ob grauitatem caudā propensius, propinquius nubibus & mediæ Regioni erit: ac proinde portio illa caudæ & thyrsus à capite ad Elementum ignis directus in cœlum erit. Denique si quis vnquam alius, hic noster Cometa exhalationes illas caudæ refutauit. Non enim flagrantem in aliqua materia ignem referebat; sed radiorum per caput traiectorum claram imaginem; per quos etiam minimas stellulas faciliè sæpe vidimus: vt illas sub Benenack & caudā Maioris Ursæ, sextæ magnitudinis.

Id etiam clarissimè apprehendi, vbi nocte horā octauā, nonā, decimā, & porro nullum barbæ vestigium circa Ursam vbi manē videram apparebat: quæ solum post mediam noctem & Sole in Hemisphærium nostrum resurgente, formari pallido quodam & tenui radiorum tractu incipiebat: qui magis tamen magisque ex viciniā

Solis aduentantis incendebantur. Hoc argumentum vix puto vlla specie posse eludi. Itaque barba illa planissimè radij solares per caput Cometæ transfuerberati erant; ibique ob materiæ densitatem refracti, & sparsi deinde in barbam. Quicumque ergo Cometæ post occasum Solem supra Horizontem relinquuntur, vt ille anni 1577. alijque plures, caudati sunt, non barbati: quia crinem in Ortum auersim à Sole dirigunt. & cum raptu primi mobilis inde ad Occasum fluant, capillus est retro, vt solent caudæ. Qui vero mane surgendo Solem præuertunt, comam in Occasum, vt noster, auertunt, & habent in mento. nisi velit eos quispiam cauda antecedente surgere, vt olim in antrum Cacus tractabat vaccas.

Notandum tamen, immò mirare potius quod eruditiss. Tycho deprehendit. In duobus anni 1577. & 1580. Cometis caudas non à Sole directè, sed à Venere fuisse auersas. Quod nescio satis, an idem statuere velim in nostro. sexto die Decemb. quando barbam fundebat inter Arcturum & sinistrum genu Bootis, Sol erat in 14. gradu sagittarij, Venus autem circa finem Capricorni in 29. eius gradu. ergo hæc amplius
falsi.

sesquisigno longius à capite Cometæ distabat quam Sol. vt ne quidem sit affine vero, ipsam potius quam Solem, tam densum radiorum fascem per Cometæ caput traiecisse; præsertim in tanta eius apparenti paruitate: & vtut etiam verum sit, Lunam inter Solem & Venerem mediam, ab istâ euidenti luce perfundi, in parte illuni & auersâ à Sole. nec valde etiam refert Venerem 6. die Decemb. circa Eccentrici perigæum, & terræ vicinam fuisse. quia in maxima depressione, & vbi visibilem disci diametrum valde laxat, decimam solum partem visibilis diametri solaris adæquat. Itaque dico, etiamsi barba non directissimè à Sole auersâ spargeretur, radios tamen Solis esse, non alterius cuiusuis errantis aut fixi, qui per Cometæ occiput cuneati mento aut ore vomebantur. Quod autem aliquando non recta, ob variam in cerebro, vt sic dicam, Cometæ radiorum refractionem accidit.

Substantia enim capitis Cometæ non vniformis densitatis aut opacitatis est, nec per quamlibet circumferentiæ partem æquè expergi possunt. velut enim rimis quibusdam alicubi dehiscit, quas replet materia rarior. hac radij trajiciuntur facilius,

quam vbi sese densat. & inde est, vt diuisæ quandoque radiorum lineæ appareant: quæ ita etiam fortè in orbem hæc illac à centro exilire & rebullire possunt, vt circumferentiam capitis coronent. Licet tamen non immeritò VIR CLARIS. dubites, an comantes vndique quis vnquam viderit Cometas. & suspicaris sidus semper aliquod fuisse, quod radijs proprijs in subiecta nube refractis se coronaret.

Sic Aristoteles olim Caniculæ coxam, sic nos ipsi nuper Venerem cornantem aspeximus. Erat enim hæc Perigæa & speciei ampliori. nubes etiam tenuis suberat, in qua nonnihil inflauerat crines. Quia vero Cometæ nostri tempus, & omnium oculi in cælum erant, quidam qui vix vnquam forte alias nocte suspexerant, Cometam alterum diffamant. adeo qui dicebatur vidisse hoc miraculum. peto vbi? quando? Ibi, inquit ab eo, & rideo Veneris etiam à me visæ fucum. Possunt etiam simiæ & spadones generari Cometæ, id est, sine cauda & imberbes.

Primò, quia materiæ forte opacitas traiectum radiorum sustinet. sic enim in Planetis videmus, quos Sol altrinsecus illucens,

lucens, nullas tamen ijs caudas annectit.

Secundò, quia à Sole tota coeli diametro distant, ac ita caudas sursum à nobis auertunt. sic enim fit vt caput Cometæ obiectum caudæ obster, ac partim ipsa etiam cauda elatior capite, altitudine oculum fallit. Ita Cometa anni 1585. è regione Solis rotunda facie, & præcisus vndiq; sine cauda aut barba fuit. atque alij an. 1580. & 1582. quanto propius Solem accedebant, tanto proluxius caudas educebant. Aliter tamen longe noster, qui vbi Tropicum æstium exiuit, longius promisit barbam, quam ante, magis tamen ad motus Soli. Et hoc vehementer firmat quod statim dicebam. Cometæ esse fungosi capitis, nec densitatis vniusmodi. Fieri ergo potest, vt motu tam Cometæ quam Solis variam faciem obuertat Soli, itaque aliâ hoc tempore viâ radij penetrabunt, & faciliori quaque longius euibrentur: quod alio breuius tantum poterant & difficilius. Ex hac etiam doctrina forte patere potest, cur nunc recta, alias, & plerumque, falcata sit barbarum longitudo: & cur noster principio conuexitatem obuernerit Septentrioni, postea vero concauum. omni enim tali verè schemate fortassis exire,

& inflecti aut dirigi radiorum lineæ possunt.

Quidam tamen rectas omnium vniuersæ Cometarum caudas sciscunt, & oculum falli, cum iudicat detorqueri. quod ideo accidit, quia caput & extremi barbæ mucrones non sunt in pari distantia à terra. Demonstratio apud Vitell. libro quarto, capite trigesimo primo, quæ longa est, & alias inspiciemus. Exinde etiam colligi potest, non esse valde timendum caudæ ab Eclipsi, si contigerit Cometæ caput è diametro fere opponi Soli. caudatus enim, quod saltem videre liceat, non erit, aut valde accincte; frustumque illud caudæ altius ipso capite est futurum. Si ergo caput vmbra terræ non extinguatur, quod est centro mundi propinquius, minus multo caudæ Eclipsin inferre poterit. Stet itaque ratum fixumque barbas Cometarum caudasque lumen Solis esse radiatum per caput.

CAPVT

CAPVT VII.

*Distantia & magnitudo
Comete.*

Quid ergo Cometâ iam faciemus? si non è materia sublunari est, ex qua igitur, & vbi? In primis tecum, CLAR. VIR, materiam cœlestem facio, & pono tamen infra Solem. Illud probatur, quia materia-
tus erat non ab Elementari, vt tamdiu iam assertum; ergo à siderea materie. Istud etiam affirmare possum vel de rudi inspectio-
ne per Batauicam Arundinem.

Barba enim valde ad orificium tubi se inclinabat, vt Luna fere solet, capite inter-
rim satis pertinaciter cœlis adhærente, vti fermè Sol aut Venus. Hinc autem elicio
barbam terris quam caput fuisse vicini-
orem; & hoc tamen infra Solem. Vt ergo
barba promitteretur infra caput, Sol excel-
sior fuisse debuit, vt à vertice ferme, per
mentum ei radium traiceret: quod non
sic fiat, si æquali à terra distantia fuisset,
aut inferiori. Eodem argumento caput Lu-
nam superauit: quia, dico, in tubum contu-
macius se demittebat.

De parallaxi, vnde altitudo eius tenuius inquiri potuit, inopia instrumentorum, non possum certi aliquid. non videtur fuisse valde magna, nec quanta in Luna apparet: & si in aere longe etiam vltra nubes fluctuasset, sine vlllo instrumento parallaxim aliquot indubie grad. apertissime oculis ingessisset. Itaque hic ego certitudinem aliquam à nostris Germanis breui exspecto, quam in subitanea hac scriptio-
ne non promisi. Libentissimè tamen omnium doctiss. Ioan. Keplerum audiam, Principem hodie in Germania Copernicanorum, qui Cometam etiam anni 1607. cum iniuria curiosorum in scriniis suis tenet, cum iam dudum videre debuisset lucem.

Sed de Copernicanis quid ex te nuper intellexi, VIR CLARISSIME? Ab vno aut altero anno damnatos à Sanctiss. D. N. Paulo V? Hactenus mihi inauditum. inauditum tot hodie per Germaniam & Italiam doctissimis & Catholicis, vti puto, viris, qui terram cum Copernico volunt.

Tantum etiam temporis interlapsum nihil amplius rumoris sparsisse? vix credam, nisi certius quid nobis venerit ab Italia. Tales enim definitiones publicandæ.

• maxi-

maximè per Academias, vbi viri docti, quibus talis opinionis forte periculum. Nam vulgus non facile adducatur, vt se cum terra rotari, firmamentum quiescere existimet: non etiam si fere Pontifex id cōstituat Cum nuper similis mentio forte iniecta esset, Rusticus aderat, & audiens à me, esse qui terram rapidissima vertigine spacio viginti quatuor horarum, cum omnibus in superficie habitantibus, circa centrum torqueri assererent. Ita, inquit, profectò: & nesciebam, cur mihi aliquando sic caput vertiginaret, maximè quando pingui cereuisia liberalius me inuiuai. Simili etiam mente Magnus noster Liphus libro 2. Physiol. c. 19. cum Pythagoram, Philolaum, Hicetā, Aristarchum, Seleucū, Cleanthem Samium, Leucippū, terrā mouisse dixisset: *Vides, inquit, deliria. quomodo aliter appellē? aut quid in ista inquiram? nisi (tantus paradoxorum amor est.) etiam patrum aucto nobilis Mathematicus (Nicol. Copernicum haud dubiè intelligit) hanc hæresim excitauit, sed cum ipso se puls. m.* Falleris vir magne: viuit & viget etiam nū apud multos. Si tamen Pontifex terram stare, cœlū circumagi decreuit; & hoc ad spiritualē Reip. Christianæ gubernationē pertinere putarit, credo Scripturā sacram ad.

adspexisse, Iosue præsertim 10. & Eccles. 1. Ibi enim Sol cursum primi mobilis abruptisse dicitur, hic oriri & occidere, & ad locum suum reuerti, gyrare se per Meridiem & flectere in Aquilonem. Quo nihil euidentius, si Scripturam in rigorosissimo sensu accipis. Quid ergo ad hæc possunt Copernicani? Dent manus, aut forte hoc. Scripturam communibus quandoq; hominum conceptionibus obsecundare. Dixisse terram stare, Solam gyron; quia sic plane videtur. hac loquendi formula dixit Virgilius Æneas:

*Prouehimur portu, terraque, vrbesque
recedunt.*

Spiritum Sanctum noluisse scriptori sacro naturæ hoc secretum reuelare, & locutiones ei permisisse quibus tropus aliquis reddat veritatem. Sed talis ego interpretamenti non facile sim auctor. quæ enim necessitas? præsertim vbi Eccles. capite 1. sic de motu Solis loquatur, vt fluminum meatibus; qui veri sunt, nec solum apparentes. Hic itaque scripturæ nodus acriter Philosophos illos Samios stringit: & speciosius reliqua dissoluam, quæ contra nectimus.

Sed

Sed ad Cometam. Dixi iam fuisse supra Lunam, sed quam longe, nec ego nec ullus mortalium facile affirmet. puto tamen ex exiguitate parallaxis semidiametrum terræ, quæ est circiter 860. milliarium Germanicorum, non fuisse valde sensibilem, si compares ad eius altitudinem. Cometa anni 1577. ab Astronomiæ tunc Principibus 210. forte terræ semidiametris ab oculo spectantis, in initio sui ortus quando terræ erat vicinissimus, dividi iudicatus fuit; id est, mill. German. communibus (quorum scilicet quodlibet 4000 pass. amplectatur) 180600. Erat ergo triplo altior Lunari orbe, quam hic distet à centro terræ. Ex veteriori enim Copernici mensurâ remouetur fornix Lunæ à centro telluris tantum 52. semidiametris, id est, mill. German. 44720. quid ergo si dicas cum Ptolemæo remoueri solum triginta tribus semidiametris? Deus immortalis quam immani & insano intervallo Lunam deorsum reliquerit! Itaque ultra Venerem orbem suum duxit; licet eruditissimus magister & prædecessor tuus Cornelius Gemma in cœlum Mercurij depresserit. Non difficile tamen alijs conciliari poterit, si omnes Planetas circa Solem conuertere suos mo-

tus,

tus, & respicere per modum centri afferamus: quod affirmant doctissimi plerique, & experientia vehementer consentit. sic enim fiet, vt quia Mercurius proxime Solem, deinde Venus, & denique Cometa ille tertius ambiuerit, Cometa nunc Venere & Mercurio altior, nunc depressior vtroque aliquando fuerit. Sed horum intellectus à noua illà cœlestium orbium dispositione pendet; de qua alias. Non existimo autem Cometam nostrum illo anni 1577. longe fuisse humiliorem. Caput tamen breuius, nec, vt ille, septem minuta in diametro visibili habuit, & milliaria Germanica in cœlo trecenta sexaginta octo. Detrahe ergo fortasse tertiam partem, relinques adhuc pro diametro nostri Cometæ ducenta quadraginta tria ferè mill. Germanica.

Longitudo caudæ illius anni 1577. fuit in cœlo terræ semidiametrorum nonaginta sex, id est, triplo maior distantia Lunæ à centro terræ, si sequimur mensuram Prolemæi. Cauda tamen nostri duplo prolixior erat, & adhuc sex gradus adjiciendi.

Quid ergo iam censebitus? Sphæræ ne Cometarum Planetarum orbibus inter-

terferemus, & cum Senecâ in æternis naturæ operibus, nec nasci aut denasci, sed vt reliqua sidera abire, redire ad suum diem Cometas putabimus? Itaque plane, si cœli infra firmamentum è solido mihi concreti.

Certè enim id probabilius imaginatione Appiani, qui ex conspiratione radiorum Solis aliorumque aliquot astrorum se in aliquo densiori sphaeræ coelestis nodo disseccantium vult formari Cometem. sæpissime namque sine Cometa accidunt tales intersectiones: nec hac via Cometarum motus vnquam expediet.

Plus aliquantulum coloris habet Cardanus (plenissimis buccis rideat Iul. Scaliger) qui pellucidos è materia coelica globos per alia sidera spargit, vt radiorum Solarium transfuerberatione accendantur in Cometas, & ducant caudam.

Si tamen probabiliorem huic opinioni speciem quis dare volet, iungenda est prior; & auferendi quandoque in altum extra humanum conspectum, alias inclinandi ad terram illi globi.

Fracaſtorij autem cœlum Cometarum infra Lunam nemo iam retineat, cum hodie & omni æuo Cometæ & ſidera alia naſcantur ſupra Lunam. Itaque ego totum à terra ad firmamenti fornicem interuallare ſpacium tecum, VIR CLARIS. affirmo liquens & nullo ſolido orbe præter nudos & ſimplices Planetarum globos inſtructum. Hoc enim, vt recte à te monitum, vel ſolæ ipſæ hæ Cometarum ibi generationes impreſſè adferunt; præter errantium laſciuos & ambagioſos in æthere illuſus, quos duplici triplicique aliquando epicyclo vix ſatis expediunt.

Obſcœnus enim aliquis Cometa & Planetarum ſimius tanti non eſt, vt cœleſtem ſphæram & cœlum totum natura ei quo circumduceretur, machinata fuerit. Non etiam videtur ad conſtitutum, vt ſidera ſolent, reuerti vllus Cometa. nulla lege oritur, nulla conditur. nunc perpetui aliquot anni talibus monſtris infames; alias multi interlabuntur, cœlo nihil minante.

Ab anno 1558. ad 1577. Cometa nullus viſus: nam ſtella anni 1572. fixa fuit, nec de Cometarum claſſe. poſtea annis aliquot ſatis denſe inſecuti. & nos præter hunc,
quod

quod equidem sciam ab anno 1607. nullum adspeximus. Duratio incerta adæque. Nullus tamé citra 7. dies, nullus vltra 130. id est, dimidiatum annum, vitam traxit. Nam flamma illa quam Iosephus supra urbem Hierosoly. ante excidium annum totum pependisse narrat, non Cometa indubie, sed prodigium maius fuit. Vt enim certo terræ loco imminere videretur, deprimi valde debuit, immobilis etiam erat: vnde in supremo æthere non stetit, secutura aliqui raptum primi mobilis. Igitur citra nubes in materia terrestri & exhalatione arsit, quam identidem deficientem subministrato nouo pabulo recreabat Angelus. Formam gladij etiam habuit, quod non solent Cometæ; & vt appareat à Deo destinato figuratam, vt de exitio admoneret, & conuerteret ad pœnitudinem.

Itaque de Cometarum ortu, parum adhuc explorati hætenus vidimus, & Astrologorū prædictiones in magna vanitate & sæpe fallaces. Habeo igitur quod de stella Sagittarij an. 1604. mense Octobri dubitem, an à coniunctione Iouis & Martis in illo signo fuerit; an altera Cassiopææ an. 1572. à magna coniunctione, cui intra

800. annos similis coire non potest, quæ anno demum 1583. euenit. Pari fortasse ratione, Cometam nostrum coniunctioni Veneris & Iouis 15. Ianuarij anni huius 1619. quis referat acceptum. & colorem res haberet, si immediatè præuenisset Cometæ ortum, aut si refecisset senescentem iam plane & defectum. Nihil autem horum fuit. Venus suum Iouem conuenit, nec tenuiter spirantes adhuc Cometæ reliquias recreauit. video effugium, in benignitate blandissimorum Planetarum, quibus inuisa diritas Cometarum. Itaque coniunctio hæc perniciem potius Cometæ nostro festinauit, & impulit diutius fortassis alias inclinaturum. Sed hæc arbitraria sunt, & quanta plurima quisque pro ingenio non difficulter confingat.

Nihil ergo (iterum dicam) de Cometarum generationis tempore certi, nihil comprehensi. Nascuntur subito, fortuitoque (nectamen nego stellas huc aliquid adferre) ac deinde statim connescent, vt multain his inferioribus. Sed ex qua materia? nam de causa efficiente, dictum ante, potissimum esse Solem, qui radio Cometæ caput inflat & extendit
in

in caudam. De materia præcipua, & immensa difficultas Copernicani forte dicant ex omnium Planetarum corporibus spiritus exhalari virtute Solis, vt interra experimur, quam cum Pythagoricis faciunt octauum Planetam. Itaque sicut Copernicus terram circa suum centrum, nubesque & exhalationes, & quicquid cum terrâ & aquâ cognitionem habet, motu circulari & eo naturali voluisciscit, ita forte omnes Planetas (excepta tamen Luna) cum exhalationibus in circumfusum ætherem ex corporibus eorum elicitis, rotari naturaliter circa Solem, vt suum centrum velit. Imo hoc asserere potes, licet Copernicanam mundi ordinationem non totam probes.

Nam licet terram in centro vniuersi stabilias, est tamen valde verosimile, omnibus Planetis (excipio semper Lunam) circa Solem, motum proprium & naturalem ire.

Mercurio & Veneri proxime (& hinc tam parum discedunt à Sole, nec eunt circa terram) vt vidit olim acutissimus Copernicus : remotius Marti, Ioui, Saturno, qui etiam intra limites

propriae periodi terram intercipiunt. Si igitur in Planetis corpora patibilia cogitemus, & quibus aliquid, vti terræ & aquæ, detrahi & exhalari possit, hinc forte materiam reperiemus pro Cometis. Nec enim detrimentum in tanta distantia oculis sentiremus; vti nec terram sub pedibus minui, quæ tot tamen vbique spiraculis, & totis Ætnæ, Vesuij, & alibi terrarum caminis in auras se expirat. & quis etiam scit, an paullo minores & breuiores orbiculi, quidam Planetarum iam quam olim? quis è vicino arbitratus est, an nihil de spherica perfectione mutilatum? certe exasperatam verrucis, collibus & montibus totis Lunæ superficiem deprehendimus. & de Venere etiam forte an probabile, quam heri 29. die Ianuar. tecum CLAR. DOMINE ET CLARISSIMIS AC ERUDITISSIMIS FRATRIBVS SESTIIS, instar Lunæ euidenter corniculantem adspeximus. Cælestes ergo illæ exhalationes secutæ naturam Planetæ vnde sunt extractæ, naturaliter currunt in orbem circa Solem, donec radijs eius in purum & liquidum æthera dissoluantur. Sed hæc agroti vereris somnia dicent, & Anticyras me sine capite mittāt, qui vna quam
à Præ-

à Præceptoribus olim acceperūt, opinione pleni, nec vltra curiosi, rident tantum, si quis noui aliquid audeat pro veritatis inuentione. Et profecto tamen ipse plures difficultates & remiliginēs in hac via prouideo, quam ostendam. Aliud ergo tentemus. Quid si dicas cum quibusdam ætherem supra Lunam, liquidissimum licet & solutissimæ raritatis, alligari tamen quandoque frigore aut alia influentia velut in nodum: qui deinde radios Solis excipiens nec tolerans diu, paullatim relaxetur, & se refundat in ætheriam & liquidam qualitatem. Motus vero circularis ei naturalis, quia æther, vnde illa materia diuersæ speciei est à corporibus elementaribus, & cui proprium & naturale in orbem agi. Sed quid sibi vult, quod Aristoteles, quod alij plures, omnes Cometas, omnes nouitias stellas in Galaxia, aut circa notant primum exoriri? An inde materiam trahunt? Adeo quidam id adserunt, vt lacunam instar semilunæ aduerterint in margine viæ lacteæ, vbi stella illa anni 1572. fulgebatur in asterismo Cassiopææ; quasi materia ibi abiisset in stellam. & vere cur non plures stellulæ quibus tota stat & distinguitur

guitur tenuibus interuallis Galaxia, potuerunt in vnam ampliolem confluxisse? cum vibrationem acerrimam illius sideris cogito, videtur ex alia materia non concreuisse Nostram etiam Cometam non existimo natum, vbi primum vidi, sed longius, & extra Tropicum hibernum in ipsa Galaxia iuxta feram & sub cauda Scorpij: inde enim recta ascendebat. & inde factum, vt in Meridie citius adspici valuerit, quam in Belgio. Hac opinione ponenda est Galaxia non firmamenti pars, sed velut annulus quidam plurimis stellis, ceu gemmis distinctus, in æthere pendens inter Saturnum & firmamenti fornicem. Hæc autem præcinctio solutilis est, & pati alterarique potest à Sole & aliis astris. pars ergo eius densatur quandoque & grauatur vt in vicinum ætherem defluat, & cum Planetis ibi ducere chorum incipiat.

Corpus enim omne cœleste orbicum motum amat, & puto à propria forma tam naturaliter gyrari, quam lapis ad terram superne præcipitat. Et sicuti lapis etiam ab hac aut illa circumferentiæ cœli parte, quacunque linea recta deorsum æqueruit: ita cœlestibus corporibus perinde

&

& æque naturale ab Oriente in Occidentem fugere, quam ab Occidente ad Ortum circulariter reuerti.

Itaque illuc feruntur, qua primus impetus inclinauit. Quia vero Cometæ non bene compacti, nec satis cohærentes, paullatim digeruntur radijs Solaribus ac rarefiunt; & tanquam à loco naturali peregrini sursum resurgunt. Experientia enim docuit altiores fieri, quo longius à die sui ortus recesserunt. Et hinc est, cur in initio accelerare proprium motum, tanquam viciniore terræ, ac deinde circa senium, quia recta fere sursum renituntur, tardari videantur. Vnde qui solidos ijs orbes queis, vt Planetæ ceteri, circumeant, etiam epicyclis dignati sunt: quia directi in principio & properantes, deinde stationarij & nil aut vix promouentes apparebant.

Fauente ergo generatione Cometarum, ego quicquid cælorum infra firmamentum est natura corruptibile censeo, & facto quandoque aliquid inde corrumpi. Vt tamen in his Elementaribus quædam metalla & lapides nullis ignibus violari possunt: sic Planetæ tãquam durissimi & excoctissimi à natura adamantes, iniuriã omnẽ

guitur tenuibus interuallis Galaxia, potuerunt in vnam ampliorem confluxisse cum vibrationem acerrimam illius sideris cogito, videtur ex alia materia non concreuisse. Nostrium etiam Cometam non existimo natum, vbi primum vidi, sed longius, & extra Tropicum hibernum in ipsa Galaxia iuxta feram & sub cauda Scorpij: inde enim recta ascendebat. & inde factum, vt in Meridie citius adspici valuerit, quam in Belgio. Hac opinione ponenda est Galaxia non firmamenti pars, sed velut annulus quidam plurimis stellis, cœcis gemmis distinctus, in æthere pendens inter Saturnum & firmamenti fornicem. Hæc autem præcinctio solutilis est, & pati alterarique potest à Sole & aliis astris. pars ergo eius densatur quandoque & grauatur vt in vicinum ætherem defluat, & cum Planetis ibi ducere chorum incipiat.

Corpus enim omne cœleste orbicum motum amat, & puto à propria forma tam naturaliter gyrari, quam lapis ad terram superne præcipitat. Et sicuti lapis etiam ab hac aut illa circumferentiæ cœli parte, quacunque linea recta deorsum æquerit: ita cœlestibus corporibus perinde &

& æque naturale ab Oriente in Occidentem fugere, quam ab Occidente ad Ortum circulariter reuerti.

Itaque illuc feruntur, qua primus impetus inclinauit. Quia vero Cometæ non bene compacti, nec satis cohærentes, paullatim digeruntur radijs Solaribus ac rarefiunt; & tanquam à loco naturali peregrini sursum resurgunt. Experientia enim docuit altiores fieri, quo longius à die sui ortus recesserunt. Et hinc est, cur in initio accelerare proprium motum, tanquam viciniore terræ, ac deinde circa senium, quia recta fere sursum renituntur, tardari videantur. Vnde qui solidos ijs orbes queis, vt Planetæ ceteri, circumeant, etiam epicyclis dignari sunt: quia directi in principio & properantes, deinde stationarij & nil aut vix promouentes apparebant.

Fauente ergo generatione Cometarum, ego quicquid cælorum infra firmamentum est natura corruptibile cenfeo, & facto quandoque aliquid inde corrumpi. Vt tamen in his Elementaribus quædam metalla & lapides nullis ignibus violari possunt: sic Planetæ tãquam durissimi & excoctissimi à natura adamantes, iniuriã omnẽ

respuunt & detractionem. Non ita liquidum illud in quo circulatur ætheris æquor, non ita Galaxiæ materies, imbecillæ nec satis cohæsæ firmitudinis. Aut certe si ætherem substantialiter corrumpi displicet, da saltem rare aliquando fieri, & addensari; & nihil vltra pro Cometis postulo. quidni autem alteratio talis in incorruptibilibus tolerari potest? in cœlo præsertim, vbi partium etiam eiusdem speciei altera rari & tenuioris fili, altera densata in stellæ orbem? Gelatur ergo quandoque in Cometam æther, & pro materiæ alligatione ac densitate longius edurat, aut maturius dispergitur. Indidem capitis etiam ac barbæ tam varia coloratio; prout opacitas radium Solis adstrinxerit, aut resoluerit transparentia.

Breuitè ergo Cometa peregrinum in Regione Planetarum sidus est, cohesum de substantia ætheris, & circulum in Sphæra, maiorem, vt Planetæ à propria forma (vel alliga intelligentiam, si vis) describens.

Non ibo iam longius (videbo quid alias facturus:) & redeo ad alia studia quæ hoc labore dies aliquot intercalau.

Falce

Fasce etiam longiore me leuasti CLARISSIME DOMINE, probandi liquiditatem ætheris vsque ad firmamenti camerationem; quod egregie profecto fecisti, immisactiam satis alte in Theologicam nostram mensem falce.

CAPVT VIII.

Praesagia Cometarum.

DE Cometarum praesagijs largiter à te dictum CLARISSIME VIR, vt nesciam quid fere possim adnectere. itaque breuiter hic & accinde me habebo. Mira Germani, alijque de antecedentium annorum Cometis vaticinati sunt, plerumque falso.

De stella illa anni 1572. quam timenda, quam paradoxa! alij, mundum ad metam certissimo venisse, & Antichristum iam iam è Moscouia aduentantem, cui stella erat verticalis. alij generalem saltem Reipublicæ Christianæ conuersionem (& scio id fauori Lutheri datum:) quam

tamen soli visuri essent, qui annum Christi 1632. alij Chymeras alias, & nugas magis maiores confinxerunt. Totidem de altero nouo fidere possumus, quod an. 1604. emicuit in Sagittario: Et vt habeant, quo sibi placeant tunc nati, doctissimi hodie viri Iouem lapidem iurare audeant, gloriosissimum Monarchā & Alexandro Magno, Cæsari aut Hannibali parem, terra celo consentiente exortum simul.

Sed de Cometa hoc nostro quid dicimus? Video, vt res iam inclinant, maiorem belli subitum infamiam, quam alterum qui anno 1607. ciuiliū armorum inducias nobis tulit. Si fixas etiam considero vbi noster diutissime hæsitauit; Vrsa Maior est, & posteriores Draconis: malignæ omnes, & de crasi Saturni, ac Martis.

Et vt magis palleas; 29. Nouembr. cum primum Louanij Cometa visus, Martem in 19. gradu Virginis notauit; directum ac præcipitem, & plane festinantem Cometæ occurrere, aut Colurum æquinoctialem occupare,

Saturnus etiam in 4. gradu Gemin. sanguinolentus & insolenter rubeus radiabat. Hoc tamen me recreauit, videre

opti-

optimum senem retrogradum, & totis quantum ætas ferebat, viribus à Cometa refugientem.

Et si quid ex alijs Planetis elicias. Sol in 7. Sagittarij, Iupiter in 29. Aquarij, Venus in 23. Capricorni, Mercurius in 19. Scorpionis erant. Vide etiam an nihil hoc ad rem faciat. Saturnus Astrologis pater Agricolarum, tristium, voracium, mendicorum, & infelicium. Iupiter Magistratum, sacerdotum, diuitum, & Iurisperitorum. Mars Ducum, militum. Sol Regum, Principum, & aulicorum. Venus hominum otiosorum, Musicorum, coquorum, & Poetarum. Mercurius Thesaurariorum, Secretariorum, Medicorum, Philosophorum, Rhetorum, & omnium Scriptorum. Luna Nunciorum & nautarum. Quid ergo iam Saturnus à Cometa timidus & regrediens? An Agricolis, uti solet, mendicis, ac miseris omnibus præcipue incumbet ista lues? Quid nos etiam in Mercurio nostro sub radiis Solis obscurati latebamus? dicturiebam aliquid; premo tamen: tu CLAR. VIR, vnam vnciam veritatis per calcinationem aut sublimationem Chymicam nobis extrahe ex hoc Mercurio; & sicubi tota
hac

hac celeri & festinata scriptione lapsus
corrigere.

Ex Musæo nostro Falconensi 3. Calendas
Februarias. CIO. IOG. XIX.

Claritudini tue deuotissimus

LIBERTVS FROMONDVS.

THOMÆ FIENI

DISPUTATIO

*An cœlum moueatur & terra
quiescat.*

AD GENEROSOS

ET

NOBILES VIROS

DD.

THOBIAM MATTHÆI

ET

GEORGIVM GAYS.



Oelum moueri, & terram
quiescere probatur; primo,
auctoritate : nam præter-
quam quod illud asserue-
rint, Aristoteles & Ptole-
mæus, eosque vnanimi cō-
sensu fere omnes Philosophi & Mathema-
tici sint secuti; excepto Copernico, Bernar-
do

do Patricio, aliisque pauculis, manifeste testatur sacra Scriptura, duobus saltem locis quos ego vidi. Etenim capite Io. Iosue habentur hæc verba: *Steteruntque Sol & Luna donec se ulcisceretur gens de inimicis suis.* Et mox subiicitur: *Stetit itaq; Sol in medio cæli, & nō festinauit occumbere spacio unius diei, & non fuit antea & postea tam longa dies.* Quibus verbis manifeste loquitur Scriptura de motu primi mobilis quo feruntur Sol & Luna motu diurno, & quo describitur dies; & indicat cælos, ac primū mobile moueri. Deniq; Ecclesiastę i. sic habetur: *Generatio præterit, & generatio aduenit, terra autem semper stat, oritur Sol & occidit, & ad locum suum reuertitur.*

Secundo probatur ratione. Primo, cæli omnes, & sidera sunt facta propter hominem, & propter alia corpora terrestria homini inferuientia; vt scilicet ea calefacerent, illuminarent, viuificarent, &cet.

Hoc facere non possunt, nisi per motum diuersis mundi partibus alternatim applicentur. Atqui verosimilius est illa se applicare per suum motum homini, & loco in quo homo degit, quam hominem se
per

per motum suæ sedis , seu sui habitaculi applicare illis. Nam illa inserviunt homini; homo vero non inservit illis; ergo verisimilius est coelos moveri, & terram quiescere, quam è contra.

Tertio , nullum probabile argumentum ex Philosophia potest excogitari, per quod videatur probari terram moveri, coelum quiescere. Ex Mathesi etiam non potest desumi . Nam siue coelum dicatur moveri, & terra quiescere; eodem modo omnia Phænomena circa corpora cœlestia saluari possunt. Nam sicut eodem modo omnia in Optica possunt saluari, siue dicantur species venire à rebus ad oculum, siue radij ab oculo ad res obiectas; Sic & in Astronomia. Ergo permanendum potius est in antiqua , & communi opinione , quam sine causa nova recipienda.

Quarto , terra est centrum mundi; & omnia corpora cœlestia videntur circa ipsam moveri; ergo debet ipsa esse immobilis: nam quidquid movetur, videtur debere moveri circa aliquid, vel super aliquo, quod est immotum.

Quin-

Quinto, si terra moueretur motu circulari. vel moueretur eo naturaliter, vel violente; siue à seipsa & natura sua, vel ab alio. Non à natura sua, neque à seipsa. Nam motus rectus à sursum ad deorsum, est ei naturalis; ergo motus circularis non potest ei esse naturalis. Nam terra est corpus simplex: Vni autem corpori simplici non possunt esse naturales duo motus specie vel genere distincti: Non etiam mouetur ab alio: Nam à quo moueretur? vel enim deberet dici moueri à Sole, vel ab alio corpore cœlesti; atqui hoc dici non potest, quia vel Sol, aut illud corpus diceretur quiescere, vel moueri. Si dicatur quiescere; ergo non potest impertiri motum alteri. Si dicatur moueri; nec sic potest terram mouere. Quia deberet mouere vel motu simili motui suo, vel contrario. Non simili, quia sic neutrum percipitur moueri, sicut quando duæ naues motu simili mouentur, non videntur moueri, sed quiescere: Non contrario, quia nihil potest dare motum contrarium motui suo. Et quia videtur Galilæus dicere, quantum ex D. D. V. V. intellexi terram moueri à Sole; Probo saltem hoc non esse verum, quia motus solis & terræ deberent

deberent esse super contrarijs, & distinctis Polis. Sol autem non potest esse causa motus illius, quod moueretur super Polis diuersis. Denique terra, neque Solis, neque alterius corporis coelestis motum sequitur; quia ipsa si moueretur, moueretur in xxiv. horis, alia omnia corpora coelestia non mouentur nisi spacio multorum dierum, mensium, & annorum; ergo. Tandem si terra moueretur ab alio, eius motus esset violentus; hoc autem est absurdum; nullum enim violentum potest esse ordinarium, ac perpetuum.

Sextò; etiamsi statueretur terra moueri; nihilominus tamen esset fatendum adhuc, quod vel ipsi Planetæ, vel eorum orbis mouerentur: nam alioquin non posset saluari diuersitas aspectuum Planetarum inter se: non posset dari ratio cur Sol ab Eclipticâ non discedat, Luna recedat: quomodo Planeta possit esse stationarius, retrogradus, altus, demissus, & infinitorum aliorum Phenomenon. Et ideo qui dixerunt terram moueri, vt Bernardus Patricius, alijque; dixerunt primum mobile quidem quiescere, & eius loco moueri terram; at tamen ipsos Planetas moueri negare mini-

me potuerunt; sed facti sunt. Et illa est ratio, cur antiqui, & moderni Mathematici, præter motum primi mobilis, etiam peculiarem motum ipsorum Planetarum ponere, & admittere sint coacti. Si ergo fatendum est, & certum sit, illa sidera ac coelestia corpora moueri; ergo verosimilius est omnem motum, qui in mundo percipitur, potius esse coelestium corporum quam terræ. Nam si reliquis omnibus adscribitur motus, cur non eadem ratione adscribetur motus diurnus potius primo mobili, quam terræ? maxime cum id quoque sensus noster videatur iudicare. Qui etsi in alijs similibus motibus aliquando quidem bene fallatur; non est tamen verosimile, æternū falli posse, aut debuisse circa motum sui principalissimi obiecti, nempe coelestium luminum.

Septimò probatur experientia. Nam si terra moueretur, quando sagitta orthogonaliter emitteretur in altum, non posset vnquam recidere in illum locum vnde esset emissa, sed deberet cadere in locum multis milliaribus remotum à loco emissionis: at hoc non fit; ergo.

Potest, & solet responderi: hoc non sequi;

sequi; propterea quod aer rapiatur cum terrâ, & sic, quia aer qui sagittam defert, eodem modo vertitur quo terra, ideo sagitta quoque defertur pariter cum eo, & sic recidit in eundem locum. Verum hæc est mera euasio, & responsio, quæ nihil valet; propter multas rationes.

Primò; quia videtur falsum aerem sic moueri, & moueri eodem motu quo terra. Nam quid moueret eum? Equidem si moueatur eodem motu quo terra; vel deberet moueri ab ipsâ terrâ, vel ab eodem illo, quod terram mouet; vel à seipso. Non à seipso; quia habet alium motum, nempe rectum sibi naturalem: tum etiam, quia cum habeat naturam, & essentiam, & qualitates omnes à naturâ & essentia terræ diuersas, non potest à naturâ sua habere eundem motum cum illa, sed necessario debet habere diuersum.

Non ab alio illo, quod terram mouet; quia illud quod terram moueret, non posset eodem omnino, & parili motu mouere aerem. Nam cum aer & essentiâ, & qualitatibus tam actiuis, quam motiuis, & modo substantiæ diuersus sit à terrâ, non posset vim motiuam illius agentis, seu illam

vim impressam eodem modo recipere sicut terra; & ita non posset eodem modo moueri sicut ipsa: Quia virtutes agentium & mouentium diuersimode recipiuntur in patientibus pro diuersitate dispositionis eorum. Non potest etiam moueri à terrâ: Quia si moueretur à terrâ, dicendus esset moueri per raptum; atqui talis motus per raptum videtur impossibilis; ergo. Minor probatur. Quia, si aer sic per raptum moueretur à terrâ, deberet aer citius moueri quam terra: propterea quod aer sit maior terrâ.

Nam quod est extra, est maius, quam quod est intra. Quando autem quod est maius, & quod est ab extra æque cito circumagitur cum eo quod est minus, & quod est ab intra; tunc illud multo velocius mouetur: & sic certum est cœlum Saturni, motu diurno, multo celerius moueri, quam cœlum Lunæ. Atqui est impossibile illud quod rapitur, celerius moueri illo, quod rapit; ergo aer non mouetur raptu terræ. Tandem ut ita esset, quod aer moueretur cum terrâ, siue à se, siue per raptum; adhuc tamen remaneret vis argumenti primi: Quia saltem eius motus

AN COELVM MOVEATUR, &c. 1:9
tus non posset esse in totum conformis
motui terræ, sicut ostendi; eo quod aer
consistentia substantiæ, qualitatibus, & es-
sentiâ à terrâ sit diuersus: sed deberet aer
segniùs saltem moueri quam terra: Quo
posito sequeretur quod sagitta emissa non
posset in idem punctum recidere: quia ter-
ra mota sicut aerem, propter segniorem
motum post se relinqueret; ita & sagittam,
quæ deueheretur ab eo.

Accedit, quod si aer non tam celeriter
moueretur, sicut terra, homo existens in
altissima turri deberet in quantacumque
aeris tranquillitate, ibi semper sentire ma-
ximum ventum, & maximam aeris agita-
tionem.

Nam quando montes, & turres moue-
rentur cum terrâ, & aer non pari celerita-
te eos assequeretur, necessarium esset;
quod illi præirent aerem findendo, & pe-
netrando, ac sulcando eum: in quâ præitio-
ne, & penetratione deberet ventus maxi-
mus percipi.

Octauò; si quis staret in altissimâ turri
vnius, aut alterius miliaris, & collimaret
ex illa turri in aliquod punctum terræ ocu-
lò perpendiculariter subiectum, & secun-

Verum responsio nō valet; quia etiamsi ille lapis etiam ex naturâ suâ verteretur in circulū sicut terra; tamen eius grauitas naturalis impediret saltem, quo minus tam celeriter ferretur, sicut aer, aut sicut terra, quæ est in suo loco naturali; & quæ consequenter sic non grauitat, sicut grauitat lapis cadens ex alto.

Denique; quia, etsi etiam lapis moueretur in orbem ex naturâ suâ, sicut tota terra, non tamen ferretur tam celeriter, sicut tota terra. Nam sicut lapis vnius pondi decidit bene ex cœlo secundum suum motum rectum ad centrum tanquam pars terræ, sicut & ipsa tota terra decideret; & tamen non decidit tam celeriter sicut tota terra: sic etiamsi quoque lapis in orbem ferretur sicut tota terra, tanquam pars eius, non tamen ferretur tam celeriter sicut tota terra; & ita quomodocumque dicatur, semper motus terræ deberet præire lapidem, & eum multis parasangis post se relinquere; & sic nunquam posset decidere in punctum collinatum, aut punctum sibi perpendiculariter subiectum: hoc est falsum; ergo.

Nonò ; si terra moueretur circulariter, deberet moueri ab Occidente per Meridiem in Orientem ; & consequenter aer deberet moueri per eandem viam. At si hoc esset ; tum si quis iacularetur versus Orientem, sagitta deberet multo longius volare, quam si iacularetur versus Occidentem : Quia quando iacularetur versus Orientem, sagitta volaret secundum motum naturalem aeris, & haberet motum aeris sibi suffragantem. At quando iacularetur versus Occidentem, haberet motum aeris sibi contrarium, & tum sagitta reniteretur motui aeris. At certum est, celerius, ac longius debere fieri illud, quod motum aeris habet propitium, quam quod aduersum ; vt patet in telis emissis secundo vento ; ergo.

Possunt adhuc nonnulla alia argumenta excogitari ; sed non sunt paris cum prædictis in demonstrando efficaciæ. Quæ etsi à me volante calamo in lecto ægro corpore, fracto crure, procul à libris sint dictata ; tantum tamen mihi videntur habere efficaciæ, vt non videam quomodo ad ea quis rectè possit respondere. Hæc scripsi

AN COELVM MOVEATUR, &c. 153
scripsi Generosi D.D. in gratiam D.D.
V. V. occasione confabulationis desu-
per in conuiuio vestro nudius quartus ha-
bitæ ; quæ vt æqui bonique consulatis,
rogo.

F I N I S.

A01 1461385

A P P R O B A T I O.

DISSERTATIONES hæc Clariss. Virorū
 THOMÆ FIENI, in Louaniensi Academia
 Archiatri, & LIBERTI FROMONDI,
 Philosophiæ ibidem Professoris, super apparitione
 nuperi SIDERIS, dignæ sunt, quæ & æsti-
 matione sua, & censuræ nostræ suffragio lucem
 adspiciant. Tum quod istius non modo SIDE-
 RIS motum, & essentiam; sed quorumvis etiam
 Cometarum naturam, & effectus considerent,
 tum quod plurium animos portentosa nouitate
 perculsos, eruditâ rationum firmitate compo-
 nant: Denique uti Christianis *non esse metuendum à*
signis cœli quæ timent gentes, luculenter demonstrât:
 ita & signorum opificē Deum, quod Eginardo suo
 Carolus verè Magnus Imper. respondisse memora-
 tur: laudandum, deprecandumq; *ut portenta in bo-*
nū vertantur, suadeant. Idem censeo de Epistolica
 Quæstione eiusdem T. FIENI, super firmitate
 & motu cœli & terræ. Actum Antwerp. In Semi-
 nario Episcopali, Kal. Februarij. M. D. C. XIX.

*Laurentius Beyerlinck S. T. L.
 Canon. & Archipresbyter Ant-
 werp. Librorumque Censor.*

SVMMA PRIVILEGII

ALBERTI & ISABELLÆ CLARÆ EVGENIÆ Archiducum Austriæ, Ducum Burgundiæ, Brabantiæ, &c. Serenissimorum Belgarum Principum Privilegio cautum est, ne quis DE COMETA Anni M.DC.XVIII. DISSERTATIONES *Thomæ Fieni*, in Academia Louanienfi, Medicinæ, & *Liberti Fromondi*, Philosophiæ, Professorum, præter *Gulielmi à Tongris* voluntatem intra sexennium in Belgio imprimat, aut alibi impressas in has Inferioris Germaniæ ditiones importet, venalesve habeat; vna cum Epistolica Quæstione eiusdem *T. Fieni*, super firmitate & motu cœli & terræ. Qui secus faxit, confiscatione exemplarium & alia graui pœna multabitur, vti latius patet in litteris datis Bruxellæ anno 1619. 4. Februarij.

Signat.

Boudevijns

ERRATA.

Pagina 36. linea 22. hic, leg. sic.
pag. 49. lin. 25. ignotorum, leg. ignitorum.
pag. 59. l. 17. in hac materia magni, leg. in hac ma-
teria non magni.

AOI 1461385





